

CART NECHW DAN' BZOJ POSTLW SAN PABLO CHE BENE' CA' ŽE' CORINTO

*Pablon' chzoje' bene' chesedop chesežague'
chesonxene' Jesucriston' Corinto*

¹ Neda' Pablo chzoja' cart nga. Diosen' gwleje' neda' par naca' postlw che Jesucriston', le can' gw-nalaže'. Na' chguapa' le'e tiox txen len bene' migw checho Sóstenes ben' lecze chejnilaže' Jesucriston'. ² Chzoja' cart nga par le'e chdop chžagle chonxenle Diosen' lo ciuda Corinto. Da' chejnilaže'le Jesucriston', da'nan' Diosen' ba gwleje' le'e cont yo'ole lo ne'e, can' gwleje' yogo' ben' chosol güiže' Xancho Jesucriston' na' zjanaque' le' txen gate'tezechle, le lecze naque' Xangaquen'. ³ Chnaba' lao Xacho Diosen' na' lao Xancho Jesucriston' yesaclene' le'e na' yesone' cont soa cuezle binlo len xbab da' yo'o lo' yichjlažda'ole.

Diosen' chaclene' chio' chejnilaže'cho Criston'

⁴ Yogo' ni'a choa' yela' choxclen che Diosen' par le'e can' chaclene' le'e lagüe chejnilaže'le Jesucriston'. ⁵ Na' da' chejnilaže'lene' chaclenchgüe' le'e cont chejni'ile yogo' da' ba bzejni'i Diosen' le'e na' cont choe'le diža' chen. ⁶ Na' ba chonle cont nacbia' xtiža' Criston' da' chejle'le naquen da' li. ⁷ Spiritw che Diosen' chonen cont chac chonle yogo' da' ca' chyažjen gonle šlac chbezcho yid Xancho Jesucriston' yeto. ⁸ Na' Diosen' gaclene'

le'e soačhachle gonle can' chazlažen' cont bibi dola' gaple caten' yid Xancho Jesucriston' yeto. 9 Diosen' zoacze' chone' can' ba gwne' gone', na' le'na' gwleje' le'e cont nacle txen len Xi'ine' Jesucriston' ben' nac Xancho.

Nža' nža'te chesena bene' chesonxen Jesucriston' Corinton'

10 Bene' migw, le'e chejnilaže'le Jesucriston'. Da'nan' chneyoeda' le'e, le gon txen len lježle na' bich gacle chople o šon taple len da' chonle xbab na' len da' žale. 11 Chnia' ca' bene' migw, le bene' nita' liž Cloé ba gose'e neda' chdile chšašle. 12 Chnia' chdile chšašle, le balle žale: "Naca' txen len da' chsed chlo'e Pablon'." Na' yeballe žale: "Naca' txen len da' chsed chlo'e Apolosen'." Na' yeballe žale: "Naca' txen len da' chsed chlo'e Pedron'." Na' yeballe žale: "Naca' txen len da' chsed chlo'e Criston'." 13 ¿Chaquele bid Criston' neče to chopzle? ¿Chaquele nedan' Pablo bnežjw cuina' gota' le'e yag cruz neče le'e? ¿Zsoale nis cont blo'ele chejnilaže'le neda'? Gague can'. 14 Choa' yela' choxclen che Diosen' bi bzoa' le'e nis, san Crispo na' Gayo na'zen' bzoa' nis. 15 Da'nan' noch no zoa len le'e bene' yesene' bzoa' legaue' nis, le bi chaclaža' no yesena gwzoe' nis cont blo'e chejnilaže' neda'. 16 Na' neda' lecze bzoa' nis bene' ca' že' liž Estéfanos, na' bi za'laža' še zoa nochle bene' bzoa' nis. 17 Nezda' Criston' bi gwsele' neda' cont gwzoa' bene' nis san cont chixjue'eda' diža' güen chen'. Na' bi cheyiljua' no diža' da' chaque benachen' diža' sina' choa' cate' chyixjue'eda' diža' güen chen', le še bene' yesone' xbab che yela' sina'

chia', nach bi yesone' xbab che dan' ben Criston' bnežjw cuine' gosote'ne' le'e yag cruzen', na' lenna' nsan' yela' guac che Diosen'.

Criston' bedelo'ede' yela' guac che Diosen' na' yela' sina' che'

¹⁸ Bene' ca' yesebiaye'e lagüe bi chesejnilaže' Jesucriston', chesacde' bibi zaca' xtiža' Criston' da' choe'cho che'cho legaque' bnežjw cuine' neche xtoła'gaque' le'e yag cruzen'. San chio' chejni-laže'chone', chio' ba de yela' mban checho toli to-cane, nezecho diža' nan' naquen da' zaca'chgua, le nsan' yela' guac che Diosen'. ¹⁹ Chac can' nyojen žan:

Neda' gona' cont nacia' gague da' li zjansina' bene' ca' chesene' zjanaque' bene' sina'.

Na' gona' cont bene' ca' chesejni'i da' zan yežlio nga, bibi de gon ca dan' chesejni'ide'.

²⁰ Chacljele ¿chixe bene' ca' zjansed yela' sina' che benachen'? na' ¿chixe bene' chososed chosoło'ede' ley che Diosen'? na' ¿chixe bene' chac chesene' diža' xdan diža' sina' che dan' chac yežlio nga? Quinga nac chegaque', Diosen' ba blo'e yela' sina' chegaquen' bi naquen da' sina'. ²¹ Diosen' naque' bene' sina' na' ba bene' cont yela' sina' che benachen' bi chaclenen legaque' yesombi'ene'. Le Diosen' chazlaže' con bene' yesejle' xtiže' dan' choe'to' gata yela' mban chegaque' toli to-cane, la'czla' yezica'chle bene' chesacde' bibi zaca' xtižen' dan' choe'ton'.

²² Bene' Israel gualaž cheto' chesenabe' yesele'ede' yela' guac cont yesejle'e bin' ža Diosen', na' bene' chesac diža' griego cheseyiljue' no diža'

da' chesacde' naquen da' sina'. ²³ San neto' chyixjue'eto' xtiža' Criston' can' bnežjw cuine' gosote'ne' le'e yag cruzen'. Na' bene' Israel gualaž četo' ca' bi chesazlaže' da' chyixjue'eto' na' bitw chesejle'en. Na' bene' bi zjanaque' bene' Israel lecze chesacde' bibi zaca' dižan' chyixjue'eton'. ²⁴ Perw chio' ba gwlej Diosen' naccho xi'ine', la'aczla' še naccho bene' Israel o še bi naccho bene' Israel, nezecho Diosen' blo'e yela' guac čhen' na' yela' sina' čhen' dan' gwsele' Criston' bnežjw cuine' neče chio'. ²⁵ Bene' ca' bi chesejnlaže' Diosen' chesacde' bi nac Diosen' bene' sina' lagüe da' be'e latje got Criston' le'e yag cruzen', na' chesacde' chlo'en bibi yela' guac nap Diosen'. Perw gague can', san xbab čhe Diosen' naquen da' sina'ch ca xbab čhe beñachen', na' nape' yela' guac xench ca beñachen'. ²⁶ Bene' migw čhia', le gon xbab can' nacle cate' Diosen' gwleje' le'e cont nacle xi'ine'. Gague zanle nacle bene' sina' len xbab čhe beñachen', gague zanle nacle bene' chnabia', gague zanle goljle lo diaža čhe bene' blao. ²⁷ Diosen' ba gwleje' chio' naccho xi'ine' la'czla' bibi yela' sina' čhe yežlio nga napcho, na' chesaque beñachen' bibi chac goncho; nach Diosen' chaclene' chio' len yela' guac čhe' na' yela' sina' čhe' cont bene' zjanac bene' sina' len xbab čhe beñachen' yesacbe'ede' na' yesacde' zto'. ²⁸ Diosen' ba gwleje' chio' naccho xi'ine', zanchi naccho no bene' yixe', no bene' chesegue'e beñach, na' gwleje' chio' cont gwlo'ede' bene' zjanaque' blao len beñachen' bibi zjazaque' len le'. ²⁹ Diosen' bene' cont nono gac gonxen cuine' lagüen'. ³⁰ Diosen' ba none' chio' txen len Cristo Jesúsén', na' Criston' nse'e yela' sina' čhe

Diosen' na' naque' la'zelagüe bene' güen bene' laždao' xilaže'. Na' dan' naccho txen len Criston', chone' chio' yela' sina' chen', na' yela' bene' güen chen', na' yela' bene' laždao' xilaže' chen', na' ba beque'e xtoła'chon'. ³¹ Da'nan' Xtiža' Diosen' nyojen žan: “Bi cheyała' gonxen cuincho san gonxencho Xanchon'.”

2

Pablo be'e xtiža' Criston' ben' gosote' le'e yag cruz

¹ Bene' migw, cate' bedetixjue'eda' xtiža' Diosen' len le'e, bitw bia' diža' zdebe da' bi gwyejni'ile na' gague bia' diža' xdan cont gaquele naca' bene' sina'. ² San bečhoglaža' be'lena' le'e diža' che Jesucriston' can' bnežjw cuine' gosote'ne' le'e yag cruz neče xtoła'chon', na' bi be'lena' le'e bichle diža'. ³ Na' cate' gwzoa' len le'e gočbe'eda' bibi chac gona', na' leca bžeba' na' goła' gwxiza' bena' xbab še bi gwzenagle xtižan'. ⁴ Na' diža' da' be'lena' le'e gague bian' len yela' sina' che beñačen' cont co'oyela' le'e gwzenagle chia', san Spiritw che Diosen' goclenen neda' len yela' guac chen na' benen cont bzenagle. ⁵ Goclaža' šejnilaže'le Criston' gague neče yela' sina' che beñačen', san neče da' gwša' Diosen' xbab chelen' len yela' guac chen'.

Spiritw che Diosen' chonen yela' chejni'i

⁶ Na' len bene' ba zjayolagüe' chosozenague' che Diosen' choe'cho diža' sina' da' za' che Diosen', bi zan' che yežlio nga ne che bene' blao o bene' gwnabia' zjanita' na'a, le te che bene' ca' na' te che yela' sina' čhegaquen'. ⁷ Diosen' ba bzejni'ide' neto' to yela' sina' da' nono gwyejni'i cani', to da'

bi'e xnezen' gac cate' bina' xe yežlion', le cana'te bi'e xnezen' yid Criston' yeque'e xtola'chon' cont soacho mbalaz toli tocanē. ⁸ Na' ne toze bene' gwnabia' bene' že' yežlio nga bi gosejni'ide' yela' sina' che Diosen', le šaca' gosejni'iden', bi bosode'e Xancho Jesucriston' ben' nac bene' zaca' juisyw le'e yag cruzen' še ca'. ⁹ Na' Xtiža' Diosen' da' nyojen žan:

Nono zoa bene' ba ble'ede' da' güen da' gon Diosen' len bene' ca' chesacde' le'.

Nono na' yende' diža' can' gone', neca na' yesone' xbab lo' lažda'ogüen' can' gaquen'. ¹⁰ Perw Diosen' ba bene' cont Spiritw chen' bzejni'in chio' can' gone', le Spiriton' chejni'in tcho'a yogo' da' chon Diosen', na' nezen da' ngaše' len benachen'.

¹¹ Can' naquen len benachen', nono neze bi xbab chon bene' yoble, con to tocho nezecho bi xbabben' choncho. Na' ca'cze naquen len Diosen', con Spiritw che' na'zen' nezen bi xbab chone'. ¹² Na' Diosen' ba bene' chio' Spiritw chen' cont nezecho yogo' da' güen da' chon Diosen' len chio' lagüe nži'ilaže'de' chio'. Da'nan' bi choncho xbab can' cheson bene' bi chosozenag che Diosen'. ¹³ Na' cate' choe'lento' le'e xtiža' Criston', gague choe'to' diža' len yela' sina' cheton', san choe'to' diža' da' bzejni'i Spiritw che Diosen' neto', na' bene' ba yo'o Spiritw che Diosen' lo' yichjlažda'ogaquen', legacze' chesejni'ide' da' chsed chlo'eto'ne'.

¹⁴ Na' bene' bi yo'o Spiritw che Diosen' lo' yichjlažda'ogaque' bi chesejle'e che diža' da' chon Spiritw che Diosen' neto' da' choe'to' len legaque', san chesacde' naquen to da' bibi zaca'. Na' bi chesejni'ide', le bi yo'o Spiriton'

lo' yichjlažda'ogaque' cont gaclenen legaque' yesejni'iden'. ¹⁵ Na' cate' yo'o Spiritw che Diosen' lo' yichjlažda'ochon' chacbe'echo che bite'teze še naquen da' zaca', perw beņe' bi yo'o Spiritw chen' lo' lažda'ogaquen', bi zaca' yesene' še da' choncho naquen da' zaca'. ¹⁶ Na' Xtiža' Diosen' da' nyojen žan: “Nono zoa chejni'i xbab che Diosen' cont gwzejni'ide' Diosa.” Perw Diosen' ba beņe' chio' Spiritw che' cont šejni'icho xbab che Criston'.

3

Gaccho txen len nochle beņe' cheson xšin Diosen'

¹ Beņe' migw, bi goc gua' xtiža' Diosen' len le'e can' chona' len beņe' chosozenag che Spiritw che Diosen', le ne' chzenagle che xbab chezle. Da'nan' zaca'leble ca bidao'. ² Cate' gwzolao be'lena' le'e xtiža' Diosen' žinten ža na'aža, biņa' šejni'ile da' ca' chaclaže' Diosen' šejni'ile. Da'nan' ba bsed blo'eda' le'e da' bi naquen zdebe šejni'ile. ³ Chzenagle che xbab chezle na' da'nan' bi chac šejni'ile xtiža' Diosen' da' naquen zdebe. Da' chgue'e lježle na' chdile chšašle, nacbja' chzenagle che xbab chezle can' cheson beņe' bi chesejnilaže' Criston'. ⁴ Chnia' chonle ca beņe' bi chesejnilaže' Diosen', le balle žale: “Nacto' txen da' chsed chlo'e Pablo”, na' yeballe žale: “Nacto' txen da' chsed chlo'e Apolos.”

⁵ Le gon xbab chia' neda' Pablo na' che Apolosen', con nacto' beņe' güen xšin Dios. Na' Diosen' bene' cont gwyejni'laže'le Xancho Criston' cate' be'lento' le'e xtižen', na' lecze gwleje' to to neto' cont gonto' con da' chnaláže'. ⁶ Neda' zaca'leba' ca to beņe' goz, le be'lena' le'e xtiža'

Diosen' da' nechw, na' Apolosen' zaca'lebe' ca' bene' chyilen, le bsd blo'ede' le'e gwdechle. Na' toz Diosen' chone' cont chac cosešen'. Ca'cze goc len le'e, Diosen' bene' cont gwyejle'le xtižen' da' be'lento' le'e. ⁷ Bitec bi zaca' neda' da' be'lena' le'e xtiža' Diosen' da' nechw, na' neca Apolosen' da' bsd blo'echde' le'e, san Diosen' zaca'chgüe' da' bene' cont gwyejle'le xtižen'. ⁸ Bene' chyixjue'ede' xtiža' Diosen' da' nechw na' bene' chyixjue'eden' da' gwchope txen chesone' xšin Diosen'. Na' Diosen' gone' cont to toe' yesenite' mbalaz con can' gosone' xšine'na'. ⁹ Neto' chzejni'ito' le'e xtiža' Diosen', guac nacho nacto' bene' goz go'on che Diosen' na' le'e nacle yežlio gan' chac žinna'.

Na' le'e chdop chžagle chonxenle Criston' lecze zaca'leble ca to yo'o che Diosen'. ¹⁰ Na' guac nacho neda' naca' to bene' chac chon yo'o na' neda' bxia' len yo'ona', le Diosen' goclene' neda' cont bxia' xšinen' gan' zoalen'. Na' na'a nita' bene' yoble chosozejni'ide' le'e, na' guac nacho chesebeque' ze'en. Na' note'teze bene' chacde' gone' xšin Diosen' cheyalā' gonyane' xbab še xšinen' gonen txen len lene yo'o dan' ba gwlecan'. ¹¹ Na' nono gac cuec bichle lene yo'o, le ba gwlecan', na' Jesucristo bene' chejnilaže'cho, len' nacho naque' lene yo'ona'. ¹² Na' bite'teze ze'e da' chozoa bene' lo lene yo'ona', chchejen con nac nonen', še nonen' de oro, de plata, de yej da' zaca', de yag o de yix o de dod. Na' ca'cze nac bite'teze da' choncho chaquecho chonchon par Diosen', chchejen še naquen da' zaca'. ¹³ Na' cate' žin ža yid Criston', gone' cont gacbia' che da' ben to tocho še naquen da' zaca' o še bitw naquen. Na' yogo' da' bencho da' bi naquen da'

zaca', Diosen' yonitlagüen' len yi' che'na' can' chac che to yo'o de yag, de yix o de dod cate' cheyen. ¹⁴ Na' še bencho da' naquen da' zaca', lenna' bi yeniten, na' Diosen' gone' cont soacho mbalaz da' benchon. ¹⁵ Na' še dan' benchon' bi naquen da' zaca', da' ca' benchon' yesebiayin' lo yi' che Diosen' na' bitec soacho mbalaz, con nacchuaze gag yechojcho bi šeycho.

¹⁶ ¿Ba beyanlaže'le chio' chdop chžagcho chonx-encho Jesucriston' yogo'cho txen zaca'lebcho ca to yodao' gan' chesonxene' Diosen'? ¿Ba beyanlaže'le zoa Spiritw che Diosen' len chio'? ¹⁷ Na' še no gone' cont chio' chdop chžagcho chonxencho Criston' cuejyichjcho diža' li chen', Diosen' gwnežjue' castigw toli tocanē che bene' gon ca', le Diosen' zoe' len chio' na' naccho lo ne'e.

¹⁸ Bi siye' cuinle. Note'tezle še chaquele nacle bene' sina' len yela' sina' che yežlio nga, cheyala' gacbe'ele yela' sina' chelen' bi gaclenen le'e len Diosen'. Na' cheyala' gacle ca to bene' bibi chejni'i cont Diosen' gone' le'e yela' sina' chen'. ¹⁹ Bene' bi chesejnilaže' Diosen', yela' sina' chegaquen' bi naquen da' zejen len Diosen'. Na' Xtiža' Diosen' nyojen žan: “Bene' ca' chesacde' zjanaque' bene' sina', Diosen' gone' cont yela' sina' chegaquen' gwžiyain' legaque'.” ²⁰ Na' yeto gan' nyojen žan: “Xancho nan' nezde' da' yesede che xbab che bene' sina' ca'.” ²¹ Da'nan' bi cheyala' ga'laže'le da' nacle txen len note'teze bene' chsed chlo'ede' le'e, le yogo'lol bi da' de zjanaquen chele cont yesaclenen le'e. ²² Neda', len Apolosen', na' len Pedron', gwsela' Diosen' neto' cont chaclento' le'e. Na' yežlio nga na' yela' mbanna', na' yela' goten', na' da'

de na'a na' da' gata' bate'teze, yogo' da' ca' zjaden cont yesaclenen le'e. ²³ Na' nacle lo na' Criston' na' Criston' naque' lo na' Diosen'.

4

Da' yo'o lo na' postlw ca' yesone'

¹ Cheyała' gacbe'ele neto' ba gwduxjue'eto' xtiža' Diosen' len le'e nacto' beñe' güen xšin Diosen'. Diosen' ba bzejni'ide' neto' da' nono gwñeze cani' cont gwsed gwlo'eton' beñe'. ² Na' chonen byen gonto' con can' ngüe'e lo na'to' gonto'. ³ Na' ca naca' neda', bibi nonen len neda' še no justis che yežlio nga o še le'e ñale bi chona' can' cheyała' gona'. Na' ñeca chnia' che cuina' še chona' can' cheyała' gona'. ⁴ Lo' lažda'ogua' chacda' bibi doła' napa' len bite'tez da' chona', perw gague da'nan' na Diosen' chia' bibi xtoła' de. Xancho Jesucriston' ñe' še chona' can' cheyała' gona' o še bi chonan'. ⁵ Da'nan' bi cheyała' žialaole ñale che note'teze beñe' še chone' can' cheyała' gone' o še bi chone'. Caten' yid Xancho Criston' yeto, canan' gone' cont ñezecho da' nono ñeze na'a, na' gone' cont gacbe'echo can' nac xbab da' yo'o lo' yichjlaždao' beñachen'. Na' cana' na Diosen' še nocho chon güen.

⁶ Beñe' migw, ba be'lena' le'e xtiža' Apolosen' na' xtiža' cate' bzejni'ida' le'e, cont soale gonle can' ža Xtiža' Diosen', le bi cheyała' ga'laže'le da' nacle txen len to beñe' chsedde' le'e na' gue'ele yetoe'. ⁷ Na' ¿bixchen' chaquele zaca'chle ca yezica'chle beñe'? Diosen' beñe' yogo' da' de chele, na' da' beñ Diosen' yogo' da' de chele, bi cheyała' ga'laže'le. ⁸ Chacljele bibi chyažjele na' chacljele

ba nacle bene' zaca'chgua len Diosen' na' guac n̄abia'le ca no rey, na' chaquele bi chyažjele neto'. Yebeto' šaca' da' li nacle ca no rey can' chaque-len' cont soato' mbalaz txen len le'e. ⁹ Chacda' Diosen' ba bene' cont bene' že' yežlion' yesele'ede' neto' postlw ca bene' zjanac la'zelagüe bene' bibi zaca', ca bene' nchoglaon chęgaque' yesate'. Na' benachen' len angl ben' že' gan' zoa Diosen' chesene'e can' chac cheto' ca to bene' chne'e to da' yežejde'. ¹⁰ Na' da' chonto' xšin Criston' da'nan' bene' zan chesacde' bibi zaca'to', perw le'e, dan' ba chejnilaže'le Criston' chaclaže'le yesacde' nacle bene' sina'. Chesacde' bibi chac gon neto', perw le'e chaclaže'le yesacde' guac gonle bite'teze. Chesonxen bene' le'e na' chesegue'ede' neto'. ¹¹ Ža na'aža zan ni'a chdeto' gwbin chbił chdonto', bibi xalana'to' de, chesebaže' bene' neto' na' bibi ližto' de. ¹² Len ni'a na'to' chonto' žin cont chacbanto'. Cate' chesezi'diža' bene' neto', con chnabto' nite' mbalaz, na' cate' chosoči chososaque' neto', chyo chęhejto' bi da' chesonde' neto'. ¹³ Cate' chesene' cheto', chol güižto' legaque' diža' šagüe'. Na' ža na'aža nita' bene' zan chesonde' neto' ca to no beb dao' o to no da' naquen zban da' ba becho'onen.

¹⁴ Chzoja' da' nga gague cont gaquele zto' san cont gwzejni'ida' le'e, le nacle ca xi'ina' na' chacda' le'e. ¹⁵ Na' la'czla' bene' zan yesaclaže' yososed yosolo'ede' le'e che Criston', bi yesenita' zane' yesacde' le'e ca xale. Perw neda' naca' ca xale, le neda' gwžialagua' gwđixjue'eda' le'e diža' güen che Jesucriston' cont chejnilaže'lene'. ¹⁶ Na' da'nan' chneyoeda' le'e gonle can' chonan'.

¹⁷ Da'nan' chsela' Timoteon' gan' zoalen'. Lecze

ba nona'ne' ca xi'ina', le bzejni'ida'ne' cont chejni-laže' Xancho Jesucriston', na' zoacze' chone' can' cheyala' gone'. Na' chselane' cont šjaysede' laže'le can' gwzoa gwleza' šlac bzejni'ida' le'e che Criston', na' da' bzejni'ida' le'e naquen lebe len da' chzejni'ida' bene' gate'teze chesedop chesežague' chesonxene' Criston'. ¹⁸ Na' balle cha'laže'le chaquele bich yida' gan' zoalen'. ¹⁹ Perw chacda' yob yida' gan' zoalen' še Diosen' gonšque' latje. Na' cate' yida', cana'ch yedena'a bene' ya'laže' ca' še yesone' can' chesenen'. ²⁰ Cate' Diosen' chnabi'e yichjlaždao' bene', dan' chesonen' chlo'en yela' guac chen', gague xtiža'gaque' na'zen' gwlo'en še chnabi'e yichjlažda'ogaque'. ²¹ ¿Nac chaclaže'le gona'? ¿Yida' gan' zoalen' na' gona' le'e castigw, še yida' gwlo'a chacda' le'e na' yedeya' diža' šagüe' len le'e? Le gon xbab naquen' chaclaže'le yedeyena'.

5

To bene' gwzoalene' xna'zie' ca xo'ole'

¹ Chesene' to le'e zoalenle xna'zile ca xo'olle. Da' nga naquen to yela' zto' xen, ne bene' ca' bi chesonxen Diosen' bi chžinlaže' yesone' ca'. ² Na' la'czla' tole chonle da' malen' nac ca', chaquele güenchgua chonle lao Diosen'. Cheyala' yegüine'le na' cheyala' yebejle ben' chon ca' len le'e. ³ La'czla' bi zoa' na' len le'e, zoaczcho txen na' ba gwchoglagua' can' cheyala' gonle len ben' chon da' malen', can' gonle la'czla' ca' zoa' len le'e. ⁴ Nach cate' ndop nžagle chonxenle Xancho Jesucriston', le gon xbab naccho txen, na' zoacze' Xancho Jesús en' chaclene' le'e len yela' guac chen'. ⁵ Nach le cuej ben' ca'ale na' le gone' lo na' Satanás dan'

chnabia' da' xigüe' ca' cont gonen can' chaclažen' len le'. Le gon ca' cont še yoša'šca yichjlažda'ogüe' na' bi cuiaye'e toli tocañe cate' žin ža yid Xancho Jesúsēn' yeto.

⁶ Bi cheyała' gaquele chonchguale güen lao Diosēn'. ¿Bi chache'ele chcha'o da' malen' cate' cho'echo latje, can' ža diža' dan' chesene': "Late'ze levadura da' chosočhine' cate' chesone' yetextil chonen cont cheyas doxen cuazin"?" ⁷ Beñe' Israel gualaž cheto' bi chesagüe' yetextil da' nchixen levadura lo lni pascw cheto' na' bi cheso'e latje yega'an ne late'ze levaduran' lo' ližgaque' lo lnin'. Na' ca'cze chio' chejnilaže'cho Criston' bi cheyała' güe'cho latje šo' da' malen' yichjlažda'ochon'. Cheyała' cuejyichjcho yogo' da' malen' cont gaccho ca to beñe' cobe, le Criston' bnežjw cuine' gote' cont bocobe' yichjlažda'ochon', na' len chio' Criston' zaca'lebe' ca to be gosot beñe' Israel gualaž cheton' lo lni pascon'. ⁸ Da'nan' cheyała' cuejyichjcho bite'teze da' mal, cont gaccho ca to beñe' cobe, soacho do yichj do laže'cho na' goncho da' zej to li.

⁹ Cana' bzoja' to cart gwnia' bi cheyała' soacho binlo len beñe' chosozoa xtoe' na' beñe' cheson bichle da' nac da' yela' zto' len cuerp chegaque'.

¹⁰ Gwnia' bi gac soacho binlo len beñe' cheson da' nac yela' zto', na' beñe' chesezelaže' bi da' de che beñe', na' beñe' chesegue'e da' de che beñe' na' beñe' chesonxene' l gua'a lsaca'. Na' can' gwnia' bi gac soacho binlo len legaque', cho'a diža' che ljež chio' chejnilaže'cho Criston'. Le šaca' choa' diža' bi gac soacho binlo len note'tez beñe' cheson ca', bich gac bi goncho lo yežlio nga še ca'. ¹¹ San da'

žia' cheya_la' goncho, bi soacho bin_lo len to bene' lježcho bene' chejnilaže' Criston' še nzoa xtoe' o še chone' bichle da' nac da' yela' zto' len cuerp che', o še chzelaže' da' de che bene', o chejnilaže' l gua'a lsaca', o chzi'diže' bene', o naque' bene' borrašw o bene' gwban. Neca cheya_la' gagwlencho bene' lježcho bene' cheson ca'. ¹² Bi naquen checho chogbi'acho che bene' bi chesejnilaže' Criston' še da' chesone' naquen güen o naquen mal, san chio' chdop chžagcho chejnilaže'cho Criston' cheya_la' chogbi'acho che lježcho še chesonteze' da' mal. ¹³ Na' Diosen' chogbi'e che xto_la' bene' ca' bi chesejnilaže' Criston', san le'e, le yebej bena' gwnia' chon da' malen' ladjwle.

6

Bene' Corinto chesejnilaže' Criston' chesagüe' xya che lježgaque' lao justis ca'

¹ Chebanda' chele can' chon_le da' chagwle xya tole yetole na' chjana'le bene' bi chosozenag che Diosen' cont chesone' yela' justis chele. Cheya_la' nabe lježle le'e ba gwlej Diosen' nacle lo ne'e cont legaque' yesone' yela' justis chele. ² ¿Bi nezele žin ža cate' chio' naccho lo na' Diosen' goncho yela' justis che yezica'chle bene' že' yežlio nga? Na' še goncho yela' justis chegaque', guac goncho yela' justis che bi da' dao' da' bitec zjazaca'. ³ Na' lecze žin ža goncho yela' justis che angl ca'. Na' naquechxe goncho yela' justis che bi da' cheson bene' lo yežlio nga. ⁴ Na' cate' gagwle xya che lježle, bi šejle lao bene' bi chesejnilaže' Criston' cont yesone' yela' justis chele, le xbab chegaquen' bi naquen da'

zaca'chgua len chio' chejnilaže'cho Criston'. ⁵ Žia' ca' cont yeto'ele che dan' chonle na' bich gonle ca'. ¿Ne tole bi nacle beṇe' sina' cont gon yela' justis che lježle cate' bi chac chele? ⁶ ¿Da'nan' chjatagwle xya che lježle len justis ca' beṇe' bi chesejnilaže' Criston'?

⁷ Da' chacyož len lježle na'zen' chlo'en leca clelen' chonle. Mbalazech zoale šaca' chdele ca'ale še bi da' chone beṇe' lježlen' le'e. Yejni'a güe'le latje yeseque'e bi da' de chele. ⁸ Perw le'e chca'ale bi da' de che lježle na' da' zan da' chone lježle.

⁹ ¿Bi nezele beṇe' ca' zjanaque' beṇe' mal lao Diosen' bi yesyežine' yaban' gan' zoa Diosen' chnabi'e? Bi güe'le latje no gonle le'e. Nita' beṇe' chosozoa xtoe' na' beṇe' cheson bichle da' yela' zto' da' nac ca'. Na' nita' beṇe' chesonxen l gua'a lsaca'. Na' nita' beṇe' chesata'lene' no'ole bi nac no'ol chegaque' o beṇe' byo bi nac beṇe' chegaque', na' nita' beṇe' byo bxej. ¹⁰ Nita' beṇe' chesebane' na' beṇe' chesezelaže' bi da' de che beṇe', na' beṇe' borrašw, na' beṇe' chesezi'diža' lježgaque' na' beṇe' cheseziye'e beṇe' yoble cont yeseque'e da' de chegaque'. Na' ne to beṇe' chon da' mal dan' zjanac ca' bi yesyežine' yaba gan' zoa Diosen' chnabi'e. ¹¹ Baḷle benle da' mal dan' zjanac ca', perw na'a da' chejnilaže'le Xancho Jesús'en', Spiritw che Diosen' ba benen cont beyac lažda'olen' xilaže', na' benen cont nacle lo na' Diosen' na' cont nacle beṇe' güen len le'.

Cheyla' goncho da' güen len cuerp chechon'

¹² Da' li can' chesena beṇe', de latje goncho bite'teze, perw nezecho gague yogo' da' gonchon' naquen güen. Na' la'czla' še de latje goncho

bite'teze, bi cheyała' güe'cho latje nabia' bi dan' gonchon' chio'. ¹³ Na' da' li can' chesena yebale', chesene': "Nsa' le'echon' par yela' guagw na' decze yela' guagw par gagwchon žinten lo' le'echo." Perw na' le'echon' len yela' guagon', chopten žin ža te čhegaquen. Na' cuerp chechon' bi nsa'chon cont gata'len xtocho o goncho bichle yela' zto' nac ca'. San nsa'chon cont gonxencho Xancho Jesucriston'. Na' Xancho Jesucriston' lecze chaclene' chio' len cuerp chechon'. ¹⁴ Diosen' bosbane' Xancho Jesucriston' ladjo bene' guat ca', na' lecze žin ža cate' yosbane' chio' ladjo bene' guat ca' len yela' guac chen'.

¹⁵ ¿Bi nezele naccho txen len Criston' na' cuerp chechon' zjanaquen che'? Na' bi cheyała' goncho cuerp chechon' da' nac che Criston' lo' na' no no'ole zle'. ¹⁶ Note'tezle še chata'le len no'ole bi nac no'ol chele o bene' byo bi nac bene' chele, cuerp chelen' gaquen toze len cuerp chen', can' ža Xtiža' Diosen' da' nyojen žan: "Bene' ca' chope yesaque' toze cuerp." ¹⁷ Perw note'tezcho cate' chon cuincho lo' na' Xancho Jesucriston', yichjlažda'ochon' chaquen toze len yichjlažda'ogüen'.

¹⁸ Da'nan' bi cheyała' gata'lencho no'ole bi nac no'ol checho o bene' byo bi nac bene' checho o goncho bichle yela' zto' da' nac ca'. Yezica'chle da' mal ca' bitec chosožiyin' cuerp chechon', perw da' ca' zjanac ca' chosožiyin' cuerp chechon'. ¹⁹ ¿Bi chache'ele Spiritw che Diosen' zoan lo' yichjlaždao' to tocho ca' zoa to bene' liže'? le Diosen' ba gwsele' Spiritw chen' zoan lo' yichjlaždao' chio' chejnlaže'cho Criston', na' bi gac goncho con bi žan checho. ²⁰ Na' da' zaca' xen da' ben

Xancho Criston' cont bechojcho lo na' gwxiyen'. Da'nan' cheya_{la}' goncho can' chazlaže' Diosen' len cuerp chechon' na' len yichjlažda'ochon', le chopten zjanaquen che'.

7

Pablon' cho'e diža' che yela' güešagna'

¹ Na' che dan' chnabele neda' le'e cart chelen', še be_{ne}' byon' bi chaclaže' si'e no'olen' gaque' xo'ole', güenna' chone'. ² Perw na' že'chgua be_{ne}' chesedalene' no'ole bi nac no'ol chegaque', na' be_{ne}' cheson bichle da' nac da' yela' zto' len cuerp chegaquen', na' da'nan' yej_{ni}'a gwšagna'le na' to to be_{ne}' byo soa xo'ole' na' to to no'ole soa be_{ne}' che'. ³ Na' to to be_{ne}' byo cheya_{la}' gone' da' naquen gone' len no'ol che' na' to to no'ole cheya_{la}' gone' da' naquen gone' len be_{ne}' che'. ⁴ No'olen' bi gac ne' to gualaze' nac gone' len cuerp chen' na' neca be_{ne}' byon' bi gac ne' to gualaze' nac gone' len cuerp chen', san cheya_{la}' yosozenag che lježe'. ⁵ Na' le'e nšagna'le bi gwžonle gonlen lježle da' cheya_{la}' gonle len cuerp chelen', perw še naquen yela' güexi'a che choptele guaccze bi gonlen to term dao' cont soatezle yol güižle Diosen'. Na' te termen' yezoalen lježle da' yoble, le Satanás dan' chnabia' da' xigüe' ca' co'oyelan' le'e gonle da' mal še leca žan soalen lježle.

⁶ Ba gwnia' yogo' da' ca' cont nezele de latje soa xo'olle, perw gague nacho chon Diosen' mandadw gwšagna'le. ⁷ Chebeda' šaca' soa yogo'le can' zoa' neda' nono xo'ola' zoa. Perw nža'le grasyw da' non Diosen' to tocho che bi da' goncho.

8 Na' le'e nac to gualazle, chacda' güen ch bi gwšagna'le, na' lecze le'e ba got beñe' chele bi yošagna'le, san soale to gualazle can' zoa' neda'.
 9 Perw še leca žan soalenle no'ole o soalenle beñe' byo, yejni'a gwšagna'le cont bi nabia' yela' chze-lažen' le'e.

10 Na' le'e no'ole le'e nšagna'le, chona' mandadw bi yela'ale len beñe' chelen'. Na' gague neda'ze žia' ca', le naquen da' chon Xancho Criston' mandadw.
 11 Na' še no'olen' yele'e len beñe' che', cheyala' soa to gualaze' bi yeque'e beñe' yoble o cheyala' yeyeje' šjayzoalene' beñe' che' da' yoble. Na' lecze le'e beñe' byo le'e nšagna'le, bi yela'ale len xo'ollen'.

12 Na' le'e beñe' yezica'chle, nia' can' chona' xbab cheyala' gonle, la'czla' Xanchon' bibi gwne' che da' ca'. To to le'e beñe' byo še ba nšagna'lenle no'ole bi chejnilaže' Criston' na' chaclaže' soalencze' le', bi cheyala' yela'ale len le'.
 13 Na' to to le'e no'ole še ba nšagna'lenle beñe' bi chejnilaže' Criston' na' chaclaže' soalene' le', bi yela'ale len le'.
 14 Bi naquen mal lao Diosen' soalenle beñe' chele o no'ol chele beñe' bi chejnilaže' Criston', le Diosen' chi' yichje' choptele dan' chejnilaže'lene' tole. Šaca' bi naquen ca', xi'inle ca' zjanacbe' ca' xi'in beñe' bi chesejnilaže' Diosen', perw gague can', le lente legacbe' chi' yichj Diosen' dan' chejnilaže'lene' tole.
 15 Perw še bene' chele o no'ole chele bi chejnilaže' Criston' na' bich chaclaže' soalene' le'e, le yela'a, le Diosen' chaclaže' soacho binlo len lježcho.
 16 Na' le'e no'ole še gonle güen len beñe' chele na' le'e beñe' byo še gonle güen len no'ol chelen', guacte gonen cont yesejnilaže' Criston'.

17 To tocho cheyała' soacho goncho da' non Xancho Diosen' lo na'cho goncho cate' gwleje' chio' naccho xi'ine'. Chona' mandadw yesone' ca' gate'teze chesedop chesežague' chesonxene' Criston'. 18 Še ba zoale señw dan' že' circuncisión cate' gwlej Diosen' le'e nacle xi'ine', bi gonle cont yenit señon'. Na' še biña' soale señon' cate' gwlej Diosen' le'e nacle xi'ine', bi nable yosozoe' le'e señon'. 19 Bibi nonen len Diosen' še nsa'cho señw che circuncisión o še bi nsa'chon. Da' naquen da' zeje, cheyała' goncho con bi chaclaže' Diosen'. 20 Con can' naccho caten' gwlej Diosen' chio' naccho xi'ine', ca'tezeczen' cheyała' soa cuezcho. 21 Še nacle esclavo cate' Xancho Diosen' gwleje' le'e, bibi sa'laže'le che dan'. Perw še guata' latje chixjwle cont chojle lo na' xanlen', le chixjon na' yechojle. 22 Na' la'czła' še nacle esclavo che bene' cate' Xancho Criston' gwleje' le'e, Criston' ba naque' Xanle na'a, gague beñachen'. Na' chio' biña' gaccho esclavo che bene', nac Criston' Xancho, na' guac nacho naccho esclavo che'. 23 Da' zaca' xen da' ben Xancho Criston' cont bechojcho lo na' gwxiyen'. Da'n'an' bi cheyała' goncho xbab no beñach naque' xancho. 24 Bene' migw, da' yoble žia' le'e, con can' naccho cate' gwlej Diosen' chio' naccho xi'ine', can' soa cuezcho, le lao Diosen' chzoa chbezcho.

25 Na' can' cheyała' gac che no'ol güego' ca', Xancho Criston' bi bene' mandadw can' gac čegacbe', perw neda' nia' can' chacda' cheyała' gac, na' ba beyaše' beži'ilaže' Xancho'n' neda', na' da'n'an' diža' da' choa' zaca'czen gwzenagle čen.

26 Ba za' da' saca'zi'cho na'a, na' da'n'an' chacda'

güen_h soa cuezcho con can' ba zoacho. ²⁷ Le'e nšagna'le, bi yela'ale len xo'olle, na' le'e bi_na' soa xo'olle, bi _hiljw xo'olle. ²⁸ Perw bi _nacho naquen mal še gwšagna'le, na' _neca naquen mal še no no'ol güego' gwšagna'. Con da' zan da' zed de yežlio nga _hche be_ne' zjanšagna', na' chaclaža' bi gac _hchele ca'.

²⁹ Be_ne' migw, chaclaža' _nia' le'e da' nga: Bich chega'an yezan iz cont goncho dan' ngüia Diosen' goncho. Da'nan' le'e zoa xo'olle cheya_la' soale gon_le xšin Diosen' ca be_ne' nono xo'ole' zoa. ³⁰ Na' še de da' yegüine'le, cheya_la' soale gon_le xšin Diosen' ca be_ne' bi chegüine'. Na' še zoale mbalaz, cheya_la' soale gon_le xšine' ca be_ne' bi zoa mbalaz. Na' še si'le bi da' si'le, cheya_la' soale gon_le xšin Diosen' ca be_ne' bibi gwxi'e. ³¹ Na' še bi da' _hch_hin_le da' de yežlio nga, bi cheya_la' cue' yičjle _hche _len, _le da' te _hche yogo' da' chle'echo yežlio nga.

³² Na' chaclaža' bi cue' yičjle _hche da' ca' chac yežlio nga. Be_ne' nono xo'ole' zoa _nlatje' gone' xbab _hche xšin _hXancho Diosen' na' _hche bi da' chaclaže' _hXancho_n' gone'. ³³ Perw be_ne' nšagne'e chi' yičje' _hche da' chac yežlio nga, _le chone' xbab _hche bi da' chaclaže' xo'olen' gone', na' gague gac gone' xbab _hche toz Diosen'. ³⁴ Na' _lecze nža' can' chac _hche no'ole nšagna' na' _hche no'olen' bi nšagna'. No'ole bi nšagna' mbec yičje' _hche xšin _hXancho Diosen' na' _hchon cuine' _lo ne'e do yičj do laže'. Na' no'ole nšagne'e _hchbec yičje' _hche da' chac yežlio nga na' bi da' chaclaže' be_ne' _hche' gone'.

³⁵ Ba gwnia' ca' gague cont gwžona' gwšagna'le san cont gaclena' le'e. Con chaclaža' gaquela _hXancho Diosen' do yičj do laže'le sin cbi gwžonen

gonle can' chazlaže'.

³⁶ Na' še to bene' chacde' cheyala' güe'e latje gwšagna' xi'ine' no'ole, na' še no'olen' ba ngole' na' chaclaže' gwšagne'e, nacczen güen gone' can' ba gwchoglaže' gone' na' güe'e latje gwšagna' xi'inen'. Bi naquen mal gwnežjue' xi'ine' no'olen' bene' chñabe' le'. ³⁷ Perw še zoa to bene' chacde' güenchnono si' xi'ine' no'olen' na' bi ñacho chonen byen gwšagna'be', nacczen güen gone' can' chazlažen' na' bi gwnežjue' bi' chen' gwšagna'be'. ³⁸ Can' naquen, bene' chnežjue' bi' chen' chšagna'be' chone' güen, na' bene' bi chnežjue'be' chone' güenchn.

³⁹ Na' note'teze no'ole nšagna', cheyala' soe' len bene' che'. Perw še ba got bene' che', guac yeque'e bene' yoble, con še bene' chejni-laže' Xancho Criston'. ⁴⁰ Perw chacda' neda' soache' mbalaz še yega'ane' to gualaze', na' chacda' xbab chian' naquen toze len xbab che Spiritw che Diosen'.

8

Yela' guagw da' chosožia bene' lao l gua'a lsaca' chesejni-laže'

¹ Na' gwñable nac cheyala' goncho len yela' guagw da' chosožie' lao l gua'a lsacan' chesejni-laže'. Da' li yogo'cho chejni'icho bibi zjazaca' l gua'a lsaca' ca'. Na' cate' choncho xbab che da' chejni'icho, con chonxen cuincho, perw cate' chaque lježcho, cheyljwlaže'cho nacle goncho cont gaclen lježcho. ² Na' še chaquecho ba gwejni'icho to da' zejen, cheyala' gache'echo bibi de da' chejni'icho ca cheyala' šejni'ichon. ³ Perw cate' chaquecho Diosen', nachle Diosen' nombi'e chio'.

4 Gw_nable še guac gagwcho yela' guagw da' chosožia bene' lao l̄ gua'a lsacan' chesejnilaže'. Nezecho l̄ gua'a lsaca' ca' bibi zjazacan', na' toz Diosen' zaque' šejnilaže'chone'. 5 Da' li de da' zan da' chesena benachen zjanaquen xangaque' da' chesejnilaže'. Na' la'czla' nita' bene' chesejnilaže' da' de yaba na' yežlion' chesene' da' ca' zjanaquen xangaque', 6 chio' nezecho toze Xacho Diosen' zaque' gonxencho, na' le' bene' cont gwxe yogo'te da' zjade na' zoacho cont gonxenchone'. Na' nezecho toze Jesucriston' naque' Xancho, na' le' bene' yogo' benach, beyixe' na' bichle da' zjade, na' le' chone' yela' mban checho.

7 Gague yogo' bene' lježcho bene' chesejnilaže' Criston' chesejni'ide' da' nga nezecho. Bale' zjayolagüe' chesone' xbab bene' zaca' l̄ gua'a lsaca' ca', na' cate' chesagüe' yela' guagw da' ba bžia bene' lao l̄ gua'a lsacan', chesacde' chesagüe' da' naquen che l̄ gua'a lsacan'. Da'nan' lo' yichjlažda'ogaque' chesacde' malen' chesone', le bi_na' yesejni'išagüe'de' naquen' naquen. 8 Na' yela' guagon' bibi zaca' gonen cont yebe Diosen' chio', neca chžonen yebede' chio' še bi gagwcho to yela' guagw o še gagwchon'. 9 Perw bal bene' bi_na' yesejni'išagüe'de' gague bi nonen len Diosen' še bin' ye'ej gagwcho. Na' neche legaque' cheyala' gwsaca'cho can' goncho cont bi goncho ca yeselažoe' lo da' malen' neche dan' che'ej chagwchon'. 10 Le'e nezele nono nac l̄ gua'a lsaca' ca', na' da'nan' guac cue'le ye'ej gagwle ga chesone' lni che l̄ gua'a lsacan' sin cbi bi do_la' gapple. Na' bene' bi_na' šejni'ide' cate' le'ede' che'ej

chagwle da'na', nach gacde' lecze guac gone' ca', perw lo' yichjlažda'ogüe' gacde' da' malen' chone'.
 11 Na' guacte gwžiai'cho bene' lježcho yela' chejni'i checho, la'czla' Criston' bnežjw cuine' gote' neče le'. 12 Cate' choncho cont bene' lježcho chesone' to da' ža yichjlažda'ogaque' naquen da' mal, choncho contr Criston' še ca'. 13 Da'nan' chnia' še dan' chagua' bela' chonen cont bene' lježa' lažoe' lo da' mal, gwbatech gagua'ba' cont ca lažoe' lo da' malen'.

9

Pablon' že' naque' dogualje postlw

1 Nezele neda' naca' postlw na' guac naba' gonele neda' ca chonle len yezica'chle postlw ca'. Neda' ble'eda' Xancho Jesúsen' na' bena' xšine' gan' zoale na' da'nan' chejnilaže'lene'. 2 Na' la'czla' še yezica'chle bene' bi chesejle'e naca' postlw, perw le'e chejle'le chia', le da' chejnilaže'le Xanchon' ben' gwsela' neda', chlo'en da' li naca' postlw.

3 Quinga choži'a xtiža' bene' ca' chesene' bi gwsela' Diosen' neda' naca' postlw: 4 Guac naba' yeson bene' da' ye'ej gagua' šaca' chaclaža' gona' ca'. 5 Na' guac gwšagna'lena' no'ole chejnilaže' Criston', na' yeči'ane' gan' šjena' xšin Diosen', can' chon Pedron', na' can' cheson yezica'chle postlw ca' na' can' cheson bene' biše' Xanchon'. 6 ¿Bixchen' neda' len Bernaben' lao yogo' postlw ca' chonto' žin len ni'a na'to' cont si'to' da' ye'ej gagwto' na' chixjwto' bichle gastw cheto' da' de šlac chyixjue'eto' xtiža' Diosen'?

7 Nono soldadw zoa bene' nacho cuinze' chyixjue' gastw che'. Na' nono gaz yag uvas še bi

gagüe' uvasen' cate' chbian. Na' lecze ca' nono beñe' chyoe šib xila' ca' nacho bi che'eje' late' xiže'ba' cate' chsien'. ⁸ Na' dan' žia' nga bi naquen con xbab cheza', le lez can' ža ley dan' bzoj da' Moisésen'. ⁹ Quinga bzoje' le'e ley: "Bi gwseyjwle cho'a goñ ca' šlac chosolej chosošošjba' trigon' cont choj xen." Na' gague da' chi' yichj Diosen' che goñ ca' bene' cont byojen žan ca'. ¹⁰ San že' ca' chzejni'icзде' chio' che beñe' ca' cheson xšin Diosen'. Da'nan' že' beñe' chgua'ane' goñ na' beñe' chonšagüe' trigw cheyała' yesenite' lez yesezi'e late' güeje cosešen'. ¹¹ Na' ca' neto' ba bzejni'ito' le'e xtiža' Diosen', le gon xbab čnaquen da' zča'och ca' da' cheyała' gonle šaca' gonle da' ye'ej gagwto' na' bichle da' chyažjeto'? ¹² Naquen da' cheyała'cze gonle dan' choe'le da' cheseyažje yezica'chle beñe' chososed chosolo'ede' le'e, perw nacchen da' cheyała' gonle gonle neto' da' chyažj chchine neto' clel ca' legaque'.

Perw bi gwnabto' gonle neto' da' chyažj chchineto'. Chyo chchejlaže'to' bite'teze da' chac cheto' cont bibi gwžon šanch le'e gwzenagle diža' güen che Criston'. ¹³ Nezele beñe' cheson mandadw lo' yodao' che neto' beñe' Israel chesacbane' len da' chosonežjw beñe' Israel gualaž cheton' che yodaon', chosyocua'ane' late' güeje beyixe' ca' chesote' lao Diosen' chesagüe'ba'. ¹⁴ Na' ca'czen' non Xancho Criston' mandadw, beñe' chosozenag xtižen' cheyała' yosonežjue' da' cheseyažje ben' cheseyixjue'ede' diža' güen chen'. ¹⁵ Perw neda' bi gwnaba' gonle da' chyažj chchinda', na' gague chzoja' da' nga cont gonle ca'. Yejni'acle gata' clel

ca naba' gonle da' chyažjda', le chebechgüeda' dan' bibi gan chona' chyixjue'eda' xtiža' Criston'.

16 Bi gac nia' chona' to goclen cate' chyixjue'eda' diža' güen che Jesucriston', le Diosen' gwleje' neda' chyixjue'edan' na' chonen byen gona' can' že'na'. Nyaše'chguaze naca' neda' še bi chixjue'edan'.

17 Šaca' chona' to da' ža xbab chia' chyixjue'edan', guac nia' zaca'czen sia' bi da' gonle neda' ca laxjua'. Perw chona' da' gwlo'o Diosen' lo na' gona', na' gague chona' to da' ža xbab chezan'. 18 Na' še nable bi chcua'anen len neda' da' chyixjue'eda' xtiža' Diosen', nach nia' chcua'anen da' chbechgüeda' bibi laxjua' chzia' chyixjue'eda' xtižen', la'czla' zaca'cza' si' laxjua'.

19 Bi naca' xmos beñe', perw chzexjw yichja' chon cuina' ca xmos yogo'te beñe' cont šanch beñe' yesejnilaže' Criston'. 20 Cate' zoa' len beñe' Israel gualaž cheton', chona' can' cheson legaque' na' chona' ca nac costumbr che ley dan' bzoj Moisés cont yosozenague' cate' güe'lena' legaque' xtiža' Diosen', la'czla' nezda' bi chonen byen ga'oguan' cont soa' binlo len Diosen'. 21 Na' cate' zoa' len beñe' bi zjanombia' ley dan' bzoj Moísesen', bi na'ogua' costumbr da' non leyna' mandadw, le chaclaža' yosozenag beñe' ca' bi zjanombia' leyna' cate' choe'lena' legaque' xtiža' Diosen'. Perw bi nacho chzoa' ca'ale dan' ža Diosen', le chzenaga' can' ža Criston'. 22 Na' cate' zoa' len beñe' chesacde' da' zan bi de lsens goncho, bi chona' da' ca' chesacde' naquen mal goncho, la'czla' nezda' bi naquen mal. Chona' ca' cont gac gwzejni'ichda' legaque'. Chon cuina' lebe len yogo'lol beñe' cont gaclena' legaque' na' bale' yesejnilaže'

Criston'. ²³ Chi' yichja' yosozenague' diža' güen che Criston' cont soa' mbalaz txen len yezica'chle bene' chosozenague' xtiža' Criston'.

²⁴ Nezecho cate' chosoxonj zan bene' cont choj to bene gon gan, yogüe' chesa'acses', la'czla' tozen' gon gan na' si'e premio. Na' ca chesa'aces bene' ca' do yichj do laže', ca' to to chio' cheyalā' soa' cho gwzenagcho che Diosen' do yichj do laže'cho cont gone' soa'cho mbalaz cate' yežincho gan' zoen'.

²⁵ Bene' güitj ca' chosochejlaže' bi chesone' con can' ža cuerp chegaquen' cont chesaque' bene' gual, le chesaclaže' yesone' gan cate' yeseyitje' na' yesezi'e premio, la'czla' dan' chesezi'en naquen to da' te che. Na' chio', chzenagcho che Diosen' cont si'cho to da' güen da' bi te chen. ²⁶ Da'nan' bi gona' ca to bene' chxonj, to bene' bi nezde' ga cheyalā' yežine', o ca to bene' chdile' len ponet, bene' bi nezde' ga cuaže'. ²⁷ Bi chzenaga' che da' mal cate' žan gona' da' mal len cuerp chian', san chona' con ga zelao chzoeda' cont chona' can' chazlaže' Diosen'. Le nezda' še gwzenaga' che da' malen', bi yebe Diosen' neda' la'czla' ba gwduxjue'eda' xtižen' len bene' yoble.

10

Cheyalā' na'yane'cho cont bi goncho da' malen'

¹ Bene' migw, chaclaža' nezele Diosen' gwzoe' len yogo'lol da' xozxtao' neto' bene' Israel cate' besyechoje' Egipto, le yogüe' gosenite' xan to bejw gan' gwyo'o Diosen', na' Diosen' bene' cont yogüe' gosodie' nisdao' da' nzi' Nisdao' Xna. ² Na' yogüe' gosaque' txen len da' Moisésen' cate' gwche'e

lega_que' gan' gwžialao bejon' laoga_que' na' cate' gosedie' nisdaon'. ³ Na' yogüe' gosagüe' toze yela' guagw da' bnežjw Diosen' lega_que'. ⁴ Na' yogüe' gose'eje' toze nis da' bnežjw Diosen' lega_que'. Na' nis da' gose'eje' bchojen lo yej, na' guac nacho Criston' goque' yej gan' bchoj nisen', le Criston' gwyejlene' lega_que'. ⁵ Na' la'czla' Diosen' goclene' yogüe', zane' bi gosone' cont yebe Diosen' lega_que', na' da'nan' gosebiaye'e latje dašen'.

⁶ Na' yogo' da' goc chega_que' chzejni'in chio' bi cheyala' selaže'cho goncho bi da' mal can' goson lega_que'. ⁷ Da'nan' chnia' le'e, bi šejnilaže'cho l gua'a lsaca' can' goson bal da' xozxta'oto' ca'. Le nyoj Xtiža' Diosen' žan: “Gosebi'e gose'ej gosagüe' na' gosenite' gosone' lni.” ⁸ Na' lecze bi cheyala' gata'lencho no'ole bi nac no'ol checho o bene' byo bi nac bene' checho. Can' goson zan da' xozxta'oto' cani', na' da'nan' šonechoa mile' gosate' yela' güen da' xinj chega_quen' lao toze ža. ⁹ Bi cheyala' goncho Xancho Criston' prueba še gone' can' ba gwnen'. Cani' bal da' xozxta'oto' ca' bi gosejle'e Diosen' gaclene' lega_que' can' gwnen', na' Diosen' gwsele' bel znia gosotba' lega_que'. ¹⁰ Na' lecze bi cheyala' bixjwcho len Diosen' can' goson bal da' xozxta'oto' ca' cani', na' Diosen' gwsele' to angl che' bene' betue' lega_que'.

¹¹ Yogo' da' ca' gosac chega_que' zjanyojen le'e Xtiža' Diosen' cont chosozejni'in chio' nac cheyala' goncho zoacho na'a, le ba zoa yeyož yežlion'. ¹² Da'nan' note'tezcho še chaquecho ba zoachachcho chejnilaže'cho Jesucriston', cheyala' na'yane'cho naquen' goncho cont bi lažo'cho lo

da' malen'. ¹³ Bite'teze da' mal da' žan goncho o da' chac checho, bi nacho zdebechle chac checho can' chac che note'teze bene'. Diosen' zoacze' chaclene' chio' can' žen', bi cho'e latje gac checho da' bi soecho. Na' chzejni'ide' chio' nac goncho cont soecho bi goncho da' malen'.

¹⁴ Da'nan' bene' migw ben' chacda', le cuejyichj yogo' bi da' cheson bene' chesejnilaže' l̄ gua'a lsaca' ca'. ¹⁵ Ba chejni'ile na' guac gonle xbab che da' quinga chzejni'ida' le'e cont šejni'ile choa' diža' da' zaca'. ¹⁶ Na' da' ca' che'ej chagwcho chjayze'echo bi zejen len chio' da' got Criston', choe'cho yela' choxc̄len che Diosen' cate' che'ej chagwchon. Na' dan' che'ejcho zejen chio' chejnilaže'chone' naccho txen len Criston' can' blalj xchene' cate' gosote'ne'. Na' dan' chagwcho late' güeje, zejen naccho txen len cuerp che Criston'. ¹⁷ Na' can' nac toze yetextil da' chzoxjcho chagw yogo'cho late' güejen, lecze ca' yogo' chio' chejnilaže'cho Criston' naccho toze len lježcho, le toze yetextilen' chagwcho txen.

¹⁸ Le gon xbab can' cheson bene' Israel gualaž cheto' ca', chesote' beyixe' cate' chesonxene' Diosen', na' note'tez bene' chesagüe' xpela' ben' chesoten' zjanaque' txen chesonxene' le'. ¹⁹ Bi chaclaža' gonle xbab žia' l̄ gua'a lsaca' ca' zjanaquen da' zaca' o yela' guagw da' chjasežia bene' laogaquen naquen nža'le len bite'teze yela' guagw. ²⁰ Gague can', le cate' bene' chosožie' bi da' chosožie' lao l̄ gua'a lsacan' dan' chesejnilažen', chosožien' lao da' xigüe' ca', gague lao Diosen', na' bi chaclaža' gacle txen len da' xigüe' ca'. ²¹ Bi gac ye'ej gagwcho da' che'ej chagwcho chjayze'echo bi zejen da' got Xancho Criston' na' lecze ye'ej

gagwcho gonxencho da' xigüe' ca'. Bi gac ye'ej gagwcho chopten. ²² Ža'a Diosen' chio' še goncho ca'. Na' bi naccho beñe' gual ca Diosen' cont soecho bi da' gone' gac checho.

Bi goncho da' chaque beñe' lježcho naquen mal

²³ Chesene': "De latje goncho bite'teze", perw nezecho gague yogo' da' choncho naquen güen, na' la'czla' še de latje goncho bite'teze, gague yogo' da' choncho chaclenen chio'. ²⁴ Ne tocho bi cheyała' goncho da' naquen güen len chio'ze, san goncho xbab še naquen güen len beñe' lježcho.

²⁵ Bite'teze bela' chesote' lagüe' ya'a le gagon' na' bi nable še bosožien' lao l gua'a lsacan' chesejni-laže', cont bi gacžejlaže'le še naple doła' gagwlen. ²⁶ Le Xtiža' Diosen' nyojen žan: "Che Xancho Dios yežlio nga, beñach, beyixe' na' yogo'te da' zjade lo yežlion'."

²⁷ Na' cate' beñe' bi chesejni-laže' Criston' chesaxe' chio' gagwcho ližgague', še šejcho nach guac gagwcho bite'teze da' yesone' gagwcho sin cbi nabcho še bosožien' lao l gua'a lsacan', le Diosen' bi che'nde' gacžejlaže'cho še napcho doła' che'ej chagwchon. ²⁸ Perw še no ye' chio': "Da' nga bosožie' lao l gua'a lsacan'", bi gagwchon cont beñe' gwna ca' bi gacde' lenczcho chejni-laže'cho l gua'a lsacan', o gacde' napcho doła' chagwchon. ²⁹ Bi nacho naquen da' mal len Diosen' gagwchon, con naquen da' mal len ben' gwna ca'.

Na' chñable ĵbixchen' cheyała' cuejyichjcho bich goncho bi da' choncho še beñe' lježcho chesacde' napcho doła' chonchon? ³⁰ Na' chonle xbab

¿bixchen' ža bene' lježcho choncho da' mal chagwcho to yela' guagw še choe'cho yela' choxc̣len che Diosen' neche len? ³¹ Quinga naquen, cate' che'ej chagwcho o bite'teze da' choncho, cheyała' gonchon cont gacxen Diosen'. ³² Na' bi cheyała' goncho bite'teze da' choncho še gonen cont bene' yoble yeselažoe' lo da' mal, la'czla' še zjanaque' bene' Israel gualaž cheton', o še bene' bi zjanaque' bene' Israel, o še ljež chio' chdop chžagcho chonx-encho Diosen'. ³³ Can' chona' neda', bite'teze da' chona' cheyiljwlaža' nacle gona' cont to to bene' soe' mba. Na' bi cheyiljwlaža' nacle gona' da' gaclen cuina' san da' gaclen bene' zan cont gata' yela' mban chegaque' toli tocaṇe.

11

¹ Neda' chona' con can' ben Criston', na' chṇeyoeda' le'e gonle can' chonan'.

Can' cheyała'yeson no'ol ca' cate' chdop chžagcho chonxencho Diosen'

² Na' na'a chnia' le'e chonle güen zoale chjayze'ele neda' na' chonle ca ba bzejni'ida' le'e. ³ Na' chaclaža' šejni'ile da' nga. Yogo' bene' byo cheyała' yosozenague' che Criston', le Criston' naque' blaoch ca legaque', na' yogo' no'ole cheyała' yosozenague' che bene' che', le bene' chen' naque' blaoch ca no'olen'. Ca'cze chon Criston', chzenague' che Xe' Diosen', le lecze naque' blaoch ca le'. ⁴ Note'teze bene' byo še nzoa xłape' cate' chol güiže' Diosen' šlac ndop nžagle txen o cate' chyixjue'ede' bi da' ža Diosen', naquen da' yela' zto', le zejen bi nac Criston' bene' blao len le'. ⁵ Na' note'teze no'ole še chol güiže' Diosen'

o chyixjue'ede' xtiža' Diosen' sin cbi gwcuāše' yichje' cate' chdop chžagle txen, naquen yela' zto' par bene' che', le naque' blaoch ca le'. Na' no'olen' chon ca' naque' lebe len no'ol ca' nšibdi yichjgaque', no'ole ca' bibi yela' zto' zjanombi'e. ⁶ Na' še no'olen' bi chaclaže' gwcuāše' yichje' can' ba gwnian', yejni'a gwšib doxen yichjen'. Da'nan' še chaquele zto' gwšiblen, nach gwcuāše'czlen can' cheson yezica'chle no'ol ca'. ⁷ Na' le'e bene' byo, bi cheyała' gwcuāše' yichjlen' cate' yoł güižle Diosen' o cate' chixjue'ele bi da' ba gwna Diosen' le'e, le Diosen' gwleje' le'e cont gwlo'ele bene' nacchgüe' bene' zaca'. Na' le'e no'ole, Diosen' gwleje' le'e cont gwlo'ele nac bene' che tole bene' zaca'. ⁸ Diosen' bi bene' bene' byo len žit costiy che no'olen', san gwleje' žit costiy che bene' byo nechon' benen' no'ole. ⁹ Na' Diosen' bi bene' bene' byon' cont gaclene' no'olen', san bene' no'olen' cont gaclene' bene' byon'. ¹⁰ Da'nan' no'ol ca' cheyała' yosocuaše' yichjgaque' cont yosolo'e nac bene' byon' blaoch ca legaque', le angl ca' chosocuaše' laogaque' lao Diosen'. ¹¹ Perw naccho txen len Xancho Jesucriston' la'czla' še naccho bene' byo o še no'ole, na' bi cheyała' yeson no'olen' xbab bi cheseyažjde' bene' byo na' neca bene' byo yesone' xbab bi cheseyažjde' no'olen'. ¹² Naquen da' li Diosen' gwleje' žit costiy che bene' byo na' benen' no'ole, na' lecze naquen da' li yogo' bene' byo zoa no'ole gwxañ le', na' Diosen' bene' yogo' beñach len bica'chle da' zjade.

¹³ Le gon xbab chele na' gacbe'ele bi chazlaže'cho cate' to no'ole chol güiže' Dios sin cbi hcuaše'

yichje', le can' nac costumbr chechon'. ¹⁴ Na' lecze bi chazlaže'cho še bene' byo bi gwšib yichjen' na' con chosožien' ca cheson bene' bxej. ¹⁵ Perw no'olen' xdanchgua nac yiša' yichjgaquen' cate' žian' da' tone, na' Diosen' none' yiša' yichjgaquen' gaquen to da' gwcušašen' yichjen'. ¹⁶ Še nole chaquele gwšaše che da' nga ba gwnia', cheyala' nezele neto' postlw bi choe'to' latje yesone' nža'le gate'teze chesedop chesežag bene' chesejnilaže' Diosen'.

Bi chjasyeze'ede' Criston' cate' chese'ej chesagüe'

¹⁷ Na' de yeto da' nia' le'e, le bi chonle güen cate' chdop chžagle chonxenle Criston' na' bi chaclenen le'e, san chonen mal. ¹⁸ To da' bi chonle güen, chesene' cate' chdop chžagle chonxenle Criston' bi chonle txen len lježle, na' chacda' nacljan' li can' chesenen'. ¹⁹ Na' ca'ljan' cheyala'cze gac da' bi chon lježle txen, le chlo'en non' chejnilaže' Criston' do yichj do laže' na' non' gague da' li chejnilaže'ne'. ²⁰ Na' cate' chežagle chagwle txen, bi chonle xbab bnežjw cuin Xancho Jesucriston' neche xtoła'chon', la'czla' chdop chžagle cont šjayze'elen. ²¹ To tole che'ej chagwle da' chyob chdoxe'le, neca chbez lježle. Da'nan' ballē ne' chdonle cate' chedagwle na' yeballē che'ej chagwḡattele na' chzože'le. ²² Yejni'a yega'an ližle ye'ej gagwle clēl ca gagwle lao bene' yaše' bene' bi de chegaque'. Da' chonle ca', nacbia' chgue'e lježle bene' cheyala' yesaque' txen len le'e da' chonxenle Diosen', na' chonle cont chesaque' tole da' bi de chegaque'. Na' naquen malchgua da' chonle ca', bi gac ni'a chonle güen.

Chjayze'echo bnežjw cuin Xancho Criston' neche xtolā'chon'

(Mt. 26:26-29; Mr. 14:22-25; Lc. 22:14-20)

²³ Xancho Jesúsēn' bzejni'ide' neda' can' šjayze'echo da' bnežjw cuine' neche xtolā'chon'. Na' neda' ba bzejni'ida' le'e can' goquen', že' cate' Judasen' bdie'ne' lo na' ben' besegue'ede' le', Xancho Jesúsēn' be_{xue}' to yetextil. ²⁴ Na' be'e yelā' choxclen che Diosen' na' beyož be'e yelā' choxclen che' na' bzoxjen', na' gwne': "Le gagw yetextil nga. Len_{na}' naquen cuerp chia' da' chnežjua' neche xtolā'le. Na' quinga gon_{le} šjayze'ele bi zejen len le'e dan' gwnežjw cuina' yesote' neda'." ²⁵ Na' le_{ce} ca' bene' cate' beyož gosagüe' xše', be_{xue}' to vas nis uvas na' gwne': "Dan' yože lo vas nga zejen da' cobe dan' gwna Diosen' gone' gaclene' le'e. Na' lalje xchenan' cont gac can' gwne' gonen'. Na' bate'teze ye'ejle ca da' nga chona' che'ejle na'a, le šjayze'e bi zejen len le'e dan' gwnežjw cuina' yesote' neda'."

²⁶ Nachen' yogo' ni'a cate' chagwcho yetextilen' na' cate' che'ejcho nis uvasen' chjayze'echo can' bene'na', na' chyixjue'echo can' bnežjw cuine' gote' neche xtolā' benachen'. Na' can' gonchczcho ślac bi_{na}' yide' da' yoble.

Naquen' goncho cate' chjayze'echo yelā' got che Xancho Jesúsēn'

²⁷ Can' naquen, še chagwcho yetextilen' na' che'ejcho nis uvasen' cont chjayze'echo yelā' got che Xancho Jesúsēn' perw še bi chonxenchone' cate' choncho ca', napcho do_{la}', le chonchon ca da' bibi zaca' cuerp che' dan' bnežjue' na' xchene' da' blalje' neche xtolā'chon'. ²⁸ Da'nan'

cheyala' gonyane'cho xbab še choncho can' chazlaže' Diosen' cate' za' gagwcho yetextilen' na' ye'ejcho nis uvasen' cont šjayze'echo yela' got che Xancho Jesúsén'.²⁹ Le še ye'ej gagwcho sin cbi gonxencho Xancho Jesúsén' da' bnežjw cuine' gote' neche xtolā'chon', Diosen' gone' chio' castigw.³⁰ Na' zanle bi zoale güen na' chacšenele na' bal bene' ba gosate' da' bi gose'ej gosagüen' do laže'.³¹ Na' še gacbe'echo na' goncho byen soacho binlo len Xancho Diosen', bi gone' chio' castigw cate' che'ej chagwchon.³² Na' cate' napcho dola' can' che'ej chagwchon, Xancho Diosen' chone' chio' castigw cont yetinjecho da' malen' choncho na' bi si'cho castigw toli tocañe can' yesezi' bene' bi chesejnilaže'ne'.

³³ Da'nān' bene' migw chia', cate' chdop chžagle txen che'ej chagwle, le cueze lježle na' ye'ej gagwle txen.³⁴ Na' še chbil chdonle, yejni'a yega'an ližle ye'ej gagwle, clēl ca gon Diosen' le'e castigw can' chonle caten' chdop chžagle. Na' che bichle da' chaclaža' gwzejni'ida' le'e, cate' yida' gan' zoalena' nach nia' can' gonlen'.

12

Spiritw che Diosen' chaclenen to tocho cont choncho bi da' choncho

¹ Na' bene' migw, chaclaža' nezele ca chon Spiritw che Diosen' chaclenen to to chio' chejnilaže'cho Jesucriston'.

² Nezele cate' bina' šejnilaže'le Criston' gwyejle'le diža' güenlaže' na' da'nān' gwyejnilaže'le l gua'a

lsaca' da' bibi biš grasyw nye'. ³ Na' da'nan' cha-claža' šejni'ile da' nga na'a. Note'teze bene' že': "Chgue'eda' Jesúsén'", bi zoa Spiritw che Diosen' len le', perw bene' že': "Jesúsén' naque Xana'", že' ca' da' zoa Spiritw che Diosen' chaclenen le'.

⁴ Toz Spiritw che Diosen' zoa, perw nža' nža' da' chaclenen to tocho choncho o nezecho. ⁵ Toz Xancho Jesucriston' chonxencho la'czla' nža' nža' ca chon to tocho xšinen'. ⁶ Na' la'czla' nža' nža' da' chon to tocho, toz Diosen' chone' cont to tocho chac choncho xšinen'. ⁷ Nacbia' zoa Spiritw che Diosen' len chio', le chonen cont to tocho chac choncho da' chaclenen yogo'cho. ⁸ Diosen' ba nsi'e xnezen' chon Spiritw chen' cont balcho chac chzejni'icho bene' yoble xbab sina' chen', na' lecze Spiriton' chonen cont yebalcho nezecho to da' nezecho na' chzejni'ichon bene'. ⁹ Na' lecze toz Spiritw chen' chonen cont balcho chejnilaže'chguacho Diosen' na' chac bite'teze da' chnabechone'. Na' da' chaclen Spiriton' chio', balcho chac choncho cont chesyeyaque bene' chesacšene. ¹⁰ Na' lecze Spiritw nan' chonen cont balcho chac choncho yela' guac, na' balcho chac chyixjue'echo bi da' ba gwna Diosen' chio'. Na' Spiritw che Diosen' chonen cont balcho chache'echo che da' chesena bene' o da' cheson bene' še zan' che Diosen' o še zan' che da' xigüe' ca', na' Spiriton' chonen cont balcho choe'cho gwde gwdele diža' da' bi nsedcho, na' yebalcho chac che'cho bene' lježcho bi zeje diža' ca'. ¹¹ Toz Spiritw che Diosen' chaclenen yogo'cho cont choncho yogo' da' chaclažen' gon to tocho.

Yogo' chio' chejnilaže'cho Criston' naccho toze can' nac cuerp chechon'

¹² Cūerp c̄hechon' n̄san' zan part, perw zjan-goden' txen na' naquen toze. Na' l̄ecze ca' chio' chejnilaže'cho Criston' naccho toze len l̄e' na' len beṇe' l̄ježcho ca'. ¹³ Baḷ chio' naccho beṇe' Israel na' yebaḷ chio' bi naccho beṇe' Israel. Baḷcho naccho esclavo na' yebaḷcho bi naccho. Perw yogo'czcho gwzoacho nis par blo'echo ba ben Spiritw c̄he Diosen' cont naccho txen len Criston', na' l̄ecze toze Spiritw c̄he Diosen' zoan l̄o' yichjlaždao' yogo'cho.

¹⁴ Cūerp c̄hechon' n̄san' zan part, na' n̄ža' can' nac to to parten'. ¹⁵ Ni'acho guac ṇan: “Bi naca' toze len cuerpen', l̄e bi naca' ne'en.” Perw l̄a'czl̄a' še ṇan ca', naquen toze len cuerpen'. ¹⁶ Na' nagcho guac ṇan: “Bi naca' toze len cuerpen', l̄e bi naca' yejlagüen'.” Perw l̄a'czl̄a' še ṇan ca', naquen toze len cuerpen'. ¹⁷ Šaca' doxen cūerp c̄hechon' naquen yejlaochō, bi gac yenecho. Na' šaca' doxen cuerpen' naquen nagcho, bi gac l̄e'echo. ¹⁸ Perw Diosen' b̄žie' bia' nsa' cūerp c̄hechon' zan part da' cheson žin con can' gwyazlaže'. ¹⁹ Na' bi nya' cūerp c̄hechon' šaca' n̄san' toze part. ²⁰ San cuerpen' n̄san' zan part da' naquen txen cont naquen toze cūerp.

²¹ Da'n̄an' yejlaochon' bi gac yen' na'chon': “Bi chyažjda' le'.” Na' n̄eca gac ye' yichjchon' ni'achon': “Bi chyažjda' le'.” ²² Na' l̄a'czl̄a' baḷ part cūerp c̄hechon' chaquecho bitec naquen da' gual, perw chyažjchon. ²³ Na' l̄a'czl̄a' baḷ part cūerp c̄hechon' chaquecho bitec bi zacan', perw chi' yichjchon, da'n̄an' cheyacw xacho. Na' part c̄he cūerp c̄hechon' da' bi chaclaže'cho le'e beṇe', chcuaše'chon len xacho. ²⁴ Perw part da' nsa' cūerp

ch_\u0302echon' da' naquen xdan, bi hcua\u0302\u0161e'chon. Na' Diosen' none' cont chi' yichjcho ch_\u0302e part ca' da' bi zjanaquen xdan. ²⁵ Na' none' cuerp ch_\u0302echon' toz cont to to parten' chap\u0302\u0161i'i lje\u0302\u0177en lebze na' chesonen \u0177in txen. ²⁶ Na' \u0161e guecho chac, bi zoa g\u0177\u0113en doxen cuerp ch_\u0302echon' \u0161e ca'. Na' \u0161e to parten' chaquecho xdan o chac chonen g\u0177\u0113enchgua, doxench\u0302o chebecho.

²⁷ Na' chio' chejnila\u0177e'cho Criston', yogo'cho ngode'cho txen len le' na' yogo'cho txen naccho cuerp ch_\u0302en', na' guac n_\u0302acho to tocho naccho ca to part g\u0177\u0113eje cuerp ch_\u0302en'. ²⁸ Na' ca nac chio' chdop ch\u0177agcho chonxench\u0302o Criston', da' nechw Diosen' gwleje' neto' nacto' postlw, na' da' gwchope gwleje' ba\u0302l be\u0302ne' cont cheseyixjue'ede' da' ba go\u0177 Diosen' legaque'. Na' da' gwyo\u0302ne gwleje' yeba\u0302l be\u0302ne' chososed cheselo'ede' xti\u0177en'. Na' le\u0302cze gwlej Diosen' be\u0302ne' cheson yela' guac, na' gwleje' be\u0302ne' cheson cont chesyeya\u0302que be\u0302ne' chesac\u0161ene, na' gwleje' be\u0302ne' chesaclene' be\u0302ne' yoble cate' bi da' cheseya\u0177jde'. Na' gwleje' be\u0302ne' chesenabia' chio' chdop ch\u0177agcho chonxench\u0302o Criston', na' gwleje' be\u0302ne' chac cheso'e gwde gwdele di\u0177a' da' bi zjansede'. ²⁹ Gague yogo'cho naccho postlw. Gague yogo'cho chac chyixjue'echo bi da' ba gwna Diosen'. Gague yogo'cho chac chsed chlo'echo be\u0302ne' xti\u0177en', na' gague yogo'cho chac choncho yela' guac. ³⁰ Gague yogo'cho chac choncho cont chesyeya\u0302que be\u0302ne' chesac\u0161ene. Gague yogo'cho chac choe'cho gwde gwdele di\u0177a' da' bi nsedcho. Gague yogo'cho chac chozejni'icho bi zejen di\u0177a' ca'. ³¹ Le yeyiljwla\u0177e' gaclen Spiritw ch_\u0302e Diosen' le'e cont gac gonle da' ca' zjanacch da' zaca'.

Na' de yeto da' zaca'ch naquen' cheya_la' soa cuezcho.

13

Cheya_la' gaque lježcho

¹ La'cz_la' še chaccho gwde gwdele diža' da' chesac be_na_{ch}en' na' da' chesac angl ca', perw še bi chaque ljež be_na_{ch}cho, bibi zaca'cho. Zaca'lebcho ca ya da' chonen sšag cate' chososižen' o ca platiy da' chososiž be_ne' güecuež. ² Na' la'cz_la' še ba goclen Spiritw che Diosen' chio' cont chac chyixjue'echo bi da' ba gwne' chio', bibi zaca'cho še bi chaque ljež be_na_{ch}cho. Na' la'cz_la' še nezecho yogo'lo_l da' nono na' neze, na' la'cz_la' še chejni'icho yogo'lo_l da' naquen da' zaque', bibi zaca'cho še bi chaque ljež be_na_{ch}cho. Na' la'cz_la' še leca chejnilaže'cho Diosen' cont chone' bite'teze da' zdebe cate' chnabechone' gonen', bicze bi zaca'cho še bi chaque lježcho. ³ Na' še gwnežjwcho be_ne' yaše' yogo' bi da' de checho na' gwnežjw cuincho yosozey be_ne' chio', bi gaclenen chio' lao Diosen' še bi chaque lježcho.

⁴ Še chaque lježcho, chapcho yela' chxenlaže' len legaque', na' choncho güen len legaque', bi chgue'echo legaque' še chac güen chegaque', na' bi chonxen cuincho len xtiža'cho, na' bi cha'laže'cho. ⁵ Na' cate' chaque lježcho bi choncho nacteze len legaque', bi choncho xbab che cuinzcho, bi chbixjwcho, na' bi chgo'olaže'cho. ⁶ Na' cate' chaque lježcho bi chbecho še chon be_ne' lježcho da' mal, san chbecho še chone' da' zej to li. ⁷ Na' cate' chaque lježcho, chapcho yela' chxenlaže' bite'teze

da' chesonde' chio', na' choncho xbab güen che yogo'lol bene', na' zoacho lez yesone' güen yogo' las, na' chy chchejlaže'cho bite'teze da' chesone bene' chio'.

⁸ Gwbat te che da' cheyała' gaque ljež beňachcho. Perw gwžin ža cate' noch no chixjue'e bi da' ba gož Diosen' le', na' gwžin ža cate' bich yesoe' bene' gwde gwdele diža' da' bi zjansede', na' gwžin ža cate' bich yažje bichle da' šejni'icho. ⁹ Biňa' nezecho na'a yogo' da' za' nezecho, na' biňa' gac chixjue'echo binlo yogo'lol da' ba gož Diosen' chio'. ¹⁰ Perw gwžin ža cate' gon Diosen' cont yogo' da' de gaquen can' cheyała' gaquen. Cana' te che da' bi naquen ca cheyała' gaquen.

¹¹ Cate' goccho bidao' be'cho diža' can' chesoe' note'teze bidao' diža', bencho xbab can' cheson note'teze bidao' xbab, na' gwyejni'icho can' chesejni'i bidao'. Na' na'a ba gwcha'ocho na' ba gwlejyichjcho bich choncho can' cheson bidao'.

¹² Na'a biňa' nezecho binlo da' nac che Diosen'. Zaca'lebcho ca bene' chne'e to lo spejw da' bitec chlo'e binlo. Perw gwžin ža cate' le'echo binlo na' nezecho doxen da' nac che Diosen', na' canan' gombia'chone' binlo ca binlo nombi'e chio'. ¹³ Nachen' da' quinga šone non Diosen' mandadw goncho toli tocanē: šejnilaže'chone', soacho lez gone' ga gacch güen checho, na' gaquecho Diosen' na' ljež beňachcho. Na' da' zejechen goncho lao da' ca' šone, gaquecho Diosen' len ljež beňachcho.

14

Beňe' ca' chesoe'lene' Diosen' diža' da' bi zjansede'

1 Cheyala' cue' yichjle gaquele Diosen' na' len ljež beṇachle, na' lecze cheyala' selaže'le gaclen Spiritw che Diosen' le'e gonle con bi da' chaclažen' gonle. Na' lao da' ca' chaclenen beṇe' bi da' chesone', da' zaca'chen da' cheseyixjue'ede' bi da' ža Diosen'. Lenna' cheyala' selaže'chgualē gonle. 2 Balcho chon Spiritw che Diosen' cont chac choe'lencho Diosen' gwde gwdele diža' da' bi nsedcho. Na' cate' choe'lenchone' dižan' nac ca', bi choe'lencho beṇachen' diža', le notno chejni'i xtiža'chon', con naquen diža' da' chon Spiritw che Diosen' choe'lenchone' la'czla' bi chejni'ichon. 3 Perw beṇe' chyixjue'ede' bi da' ba gwna Diosen', chaclene' beṇe' yoble yesenita'chache' yesejnilaže' Diosen', na' yesenite' mbalazech, na' cheseyacxenlaže' še bi da' chesac chegaque'. 4 Cate' choe'cho gwde gwdele diža' da' bi nsedcho, yichjlažda'ocho na'zen' chaclenen. Perw še chyixjue'echo bi da' ba gwna Diosen', chaclenen yogo' chio' chdop chžagcho chonxencho Criston'. 5 Yebeda' šaca' yogo'le gac güe'lenle Diosen' gwde gwdele diža' da' bi nsedle, perw yebechda' juisyw šaca' yogo'le gac chixjue'ele bi da' ye' Diosen' le'e. Lenna' zejechen clel ca' güe'lenchone' gwde gwdele diža' šlac ndop nžagcho chonxencho Diosen'. Le še nono zoa no gwzejni'i bi zejen gwde gwdele diža' dan' chon Spiriton' nacho, bitw gaclenen beṇe' ljezcho yesenita'chache' yesejnilaže'ne'. 6 Bene' migw, nezda' bi gaclenen le'e še güe'lēna' Diosen' gwde gwdele diža' da' bi chejni'ile caten' yedēna'a le'e. Perw gaclenen le'e še gwzejni'ida' le'e bi da' ba bzejni'i Diosen' neda'. Na' gaclenczen še gwzejni'ida' le'e bichle da' nezda' che Diosen', o bi

da' ba gože' neda' cont chixjue'eda' le'e, o še gwsed gwlo'eda' le'e bi zeje xtizen'.

⁷ Ca nac bžejo, bi mbanen perw zoa ši'in cate' chcuež beņe' len, na' lecze ca' arpan' cate' chyin beņe' len. Na' še toz nota da' chcuež ben' len bžejoa' o toz nota da' chyin ben' cate' chyine' arpan' bate'teze, nono gacbe'e bin' chosocueže' še bi yosoše'e güeltze nota dan' chosocuežen'. ⁸ Cate' zoa to beņe' chcueže' trompeta cont cheseņeze soldadw ca' naquen' yesone', še bi gwcuežen' binlo, bi yesejni'ide' cheyała' šja'aque' lo gwdiłe. ⁹ Ca'cze naquen len chio', še güe'lencho Diosen' diža' da' bi chesejni'i beņe', bi gaclenen legaue', le len legaue' naquen ca che beņe' chšalj toze'. ¹⁰ Nezecho beņe' že' doxen yežlion' gwde gwdele diža' da' chesaue', na' to to beņach chesejni'ide' dižan' goljelene'. ¹¹ Na' še chio' bi chaccho diža' da' chac yeto beņe', nezecho naque' beņe' zito' len chio' na' naccho beņe' zito' len le'. ¹² Na' dan' chi' yichjle gaclen Spiritw che Diosen' le'e cont gac gonle bi da' chaclaže'le gonle, ca'czen cheyała' cue' yichjle gaclenen le'e gonle da' gaclen lježle cont yogo'le soachachle šejnilaže'le Diosen'.

¹³ Na' še Spiritw che Diosen' gonen cont güe'lencho Diosen' gwde gwdele diža' da' bi nsedcho, cheyała' nabcho lecze gaclenen chio' gwzejni'icho beņe' bi zeje diža' dan' choe'lencho Diosen'. ¹⁴ Le cate' Spiriton' chonen cont chol güiža' Diosen' len diža' da' bi nseda', con nežda' lo' yichjlažda'ogua' choe'lena' Diosen' diža', perw bi chona' xbab chen, le bi chejni'idan'. ¹⁵ Quinga cheyała' goncho cate' chol güižcho Diosen', cheyała' güe'lenchone' bite'teze diža' da' chon

Spiritw chen' chio' la'czla' še bi chejni'ichon, na' lecze cheyala' güe'lenchone' diža' da' chejni'icho. Na' cheyala' golcho bite'teze da' chon Spiritw che Diosen' golcho la'czla' še bi chejni'ichon, na' lecze cheyala' golcho da' chejni'icho. ¹⁶ Le še chonxencho Diosen' o choe'cho yela' choxclen che' len diža' da' bi chejni'i bene' yoble, bene' bi chesejni'i dižan' choe'chon' bi gac yesonxene' Diosen' txen len chio'. ¹⁷ La'czla' še choe'cho yela' choxclen che Diosen' binlo, perw bi chaclenen bene' yoble še bi chesejni'ide' xtiža'chon'. ¹⁸ Choa' yela' choxclen che Diosen' da' choe'lencha'ne' gwde gwdele diža' da' bi nseda' clcl ca le'e. ¹⁹ Perw cate' ndop nžagcho chonxencho Criston' yejni'a gua' gayo'ze diža' da' yesejni'i bene' cont gwzejni'ida' legaque', clcl ca gua' ši mil diža' da' bi yesejni'ide'.

²⁰ Bene' migw, bi cheyala' šo'cho xbab che bidao' biña' šejni'i, san šo'cho xbab che bene' chejni'i. Perw len da' malen' cheyala' gaccho ca bidao' bi' biña' gon da' mal. ²¹ Xtiža' Diosen' nyojen žan: “Neda' Dios gona' cont bene' zito' yesoe'lene' bene' Israel quinga xtiža', perw ne ca'cze bi yosozenague' chia'.” Can' ža Xancho Diosen'. ²² Da'nan' nezecho Diosen' chchine' gwde gwdele diža' da' choe'lenchone' cont bene' bi yesejnilaže'ne' yesache'ede' zoacze' len chio'. Na' chio' chejnilaže'chone', Spiritw che Diosen' chonen cont bene' cheseyixjue'ede' chio' bi da' ba gož Diosen' legaque'. Can' chone' chzejni'ide' chio'. ²³ Le gon xbab nac gac še šlac ndop nžag yogo'cho txen chonxencho Criston' yogo'cho güe'lencho

Diosen' gwde gwdele diža' da' bi nsedcho, na' yesela' bał beņe' bi chesejni'i naquen' choncho chonxenchone' o beņe' bi chesejnilaže'ne', legaque' yesene' chactontcho. ²⁴ Perw še beņe' ca' bi chesejnilaže' Diosen' o beņe' ca' bi chesejni'i naquen' chonxenchone' yesela'aque' šlac yogo'cho chzejni'i lježcho bi da' ba gož Diosen' chio', nach yesache'ede' zjade xtole' cate' yesende' xtiža' yogo'cho, na' yesyetinjde' da' malen' chesonen'. ²⁵ Le yesache'ede' Diosen' nombi'e xbab da' chesone' lo' yichjlažda'ogüen', nach yosozoa xibe' yesonxene' Diosen' na' yesene': "Da' licze zoa Diosen' len beņe' quinga."

Cheyała' gonxencho Diosen' binlo na' bi gonchon nacteže

²⁶ Beņe' migw, cate' chežagle chonxenle Diosen' quinga gonle: Balle de to da' golle gonxenle Diosen', na' balle de da' gwsed gwlo'e lježle, na' balle de da' ba gož Spiritw che Diosen' le'e, na' balle de gwde gwdele diža' da' güe'le da' bi nsedle, na' yeballe chaclaže'le chixjue'ele bi zejen gwde gwdele dižan' ba gwna beņe' lježlen'. Naquen güen gonle yogo' da' ca' con še gonlen ga gaclenen lježle. ²⁷ Na' še nole güe'lenle Diosen' gwde gwdele diža' da' bi nsedle, le güen', perw do chopzle o še šonzle na' tgüeje tgüejle, na' tena' choj beņe' yozejni'ide' bi zejen diža' dan' ba be'le. ²⁸ Na' še nono zoa no yozejni'i bi zeje dižan', bi cheyała' güe'le dižan' zižje gan' ndop nžaglen', con lo' lažda'ole na'zen' güe'lenle Diosen' diža', še ca'. ²⁹ Na' še chixjue'ele bi da' ba gwna Diosen', lecze do chopzle o šonzle chojle chixjue'elen šlac ndop nžagle na'

yezica'chle bene' yosozenague' na' yesone' xbab še dan' žalen' naquen lebze len Xtiza' Diosen' dan' nyoj. ³⁰ Na' še šlac tole choe'le diža', Diosen' gwzejni'ide' yetole to da' chixjue'ele, cheyała' cuezle na' güe'le latje chixjue'e ben' yeto dižan'. ³¹ Yogo'le guac chixjue'ele da' gož Diosen' le'e, perw gonlen tgüeje tgüejele cont yogo'le šejni'ichle na' gaclenen le'e. ³² Na' le'e chyixjue'ele bi da' ba gwna Diosen', cheyała' chixjue'elen con baten' naquen güen chixjue'elen. ³³⁻³⁴ Le Diosen' chaclaže' gwsa'le binlo da' chonle caten' chdop chžagle chonxenle' na' bi gonlen nacteze.

Na' caten' chdop chžagle chonxenle Criston', cheyała' gwžonle yesoe' no'ol ca' diža' šlac ndop nžagle, can' chesežone' gate'teze chesedop chesežague' chesonxene'ne'. Cheyała' yesenita' no'ol ca' yosozenague', le can' ža leyna'. ³⁵ Na' še bi da' chesaclaže' no'ol ca' yesenezde', guac yesenabde' bene' chegaque' cate' yesyežin ližgaque', le naquen da' yela' zto' še no no'ole güe'e diža' šlac ndop nžagcho.

³⁶ Le gon xbab, gague le'e gocle bene' nechw bene' gwyejnilaže' xtiza' Criston', na' bi nacho nezechle ca bene' chesedop chesežag ga yoble chesonxene'ne'. ³⁷ Še nole chaquele chac chyixjue'ele bi da' ba gwna Diosen' o še chaquele chaclen Spiritw che Diosen' le'e len bichle da' chonle, nachen' cheyała' gacbe'ele da' quinga chzoja' le'e naquen da' non Xancho Criston' mandadw goncho. ³⁸ Na' note'teze bene' bi chejle'e še Xancho Criston' bene' cont bzoja' da' quinga, bi zaca' šejle'cho che' bite'teze da' že'.

³⁹ Na' quinga naquen bene' migw, le cuec yichjle gaclen Spiritw che Diosen' le'e cont chixjue'ele bi da' na Diosen', na' bi gwžonle yesoe' bene' gwde gwdele diža' da' chnežjw Spiritw che Diosen' yeso'e. ⁴⁰ Perw binlo gonle yogo' da' chonle cate' chdop chžagle na' bi gonlen nacteze.

15

Beban Criston' ladjo bene' guaten'

¹ Bene' migw, chaclaža' gonle xbab che diža' güen che Criston' da' ba be'lena' le'e. Ba bzenagle chen na' zoachachle chejle'len. ² Na' nezele šjayzoale len Diosen' še soatezle gwzenagle che diža' güen chen'. Na' še bi gwzenagle chen, bibi zejen da' žale chejle'len'.

³ Diosen' bzende' neda' da' quinga da' zjanaquen la'zelagüe' da' zejen na' bach gwduxjue'edan' le'e. Criston' bnežjw cuine' gote' cont beque'e xtoła'chon' con can' nyoj Xtiža' Diosen'. ⁴ Nach bosocuaše'ne', na' beyon ža beyas bebane' ladjo bene' guat ca' con can' nyoj Xtiža' Diosen'. ⁵ Nach jaylo'elagüe' Pedron' na' gwdechle jaylo'elagüe' yezica'chle postlw ca'. ⁶ Beyoža' jayezlo'elagüe' gwdele gayo' gayoa bene' to ši'ize, bene' chesonxene' le'. Na' zan bene' ca' ne' zjamban, la'czla' bale' ba gosate'. ⁷ Nach jayzlo'elagüe' Jacobo. Gwde na' jayzlo'elagüe' yogo' postlw ca'.

⁸⁻⁹ Bzbe bedyelo'elagüe' neda', zaca'leba' ca' bi golje cate' bina' žin ža, le cana' bchi bsaca' bene' ca' chesedop chesežag chesonxene' Criston'. Na' da'nan' chacda' bicze zaca' yososi'e neda' postlw.

10 Perw Diosen' nži'ilaže'de' neda' na' gwleje'nda' naca' postlw che', na' choncha' xšinen' clel ca bene' lježa' ca' yezica'chle. Na' nezdā' gague chonan' neda', san Diosen' chaclene' neda' cont chonan'.
 11 Da'nān' bibi nonen še xtiža' nedan' ba bzenagle o še xtiža' nochle postlw ca', le toze can' chyixjue'eto' che Criston' na' can' nac dan' ba chejle'le chen'.

Yesyeban bene' guat ca'

12 Yogo' neto' chyixjue'eto' beban Criston' ladjo bene' guat ca'. Da'nān' ħbixchen' ža balē bi yesyeban bene' guat ca'? 13 Šaca' naquen diža' li dan' žale bi chosban Diosen' bene' guat ca', zejen bi beban Criston' še ca'. 14 Na' šaca' Criston' bi bebane' ladjo bene' guat ca', bibi zaca' xtižen' da' be'lento' le'e na' bibi zejen da' chejni-laže'lene' še ca'. 15 Ba be'lento' le'e diža' güen-laže' gwnato' Diosen' bosbane' Criston' ladjo bene' guaten' šaca' naquen diža' li dan' žale bi chosbane' bene' ba gosat. 16 Le šaca' bi chosbane' bene' ba gosat, lecze bi bosbane' Criston'. 17 Šaca' naquen da' li Diosen' bi bosbane' Criston', bibi zejen da' chejni-laže'chone' na' bi nacho beque'e xtoła'chon'. 18 Šaca' naquen da' li bi bosbane' Criston', ba gosebiayi' yogo' bene' ba gosat bene' gosejni-laže' Criston' še ca'. 19 Na' šaca' da' zoacho lez šjayzoalencho Criston' cate' yeza'cho yežlio nga naquen da' güen-laže', yela' zi' xench chac che chio' chejni'ilaže'cho Criston' clel ca che yezica'chle bene' še ca'.

20 Perw na' da' li Diosen' bosbane' Criston' ladjo bene' guat ca', na' da'nān' nezecho žin ža yosbane' yezica'chle bene' chesejni-laže'ne' še ba gosate'. 21 Gwxē yela' goten' yežlio nga da' gwzōa'

to bene' bene' da' mal, na' lecze ca'czen' goc, to bene' bene' cont žin ža yebancho ladjo bene' guat. ²² Le gwxe yela' goten' cate' Adanna' bene' da' malen', da'nan' yogo' benačen' chesate'. Nach Criston' bene' cont yogo' bene' yesaque' txen len le' yesenite' toli tocanē. ²³ To tocho yebancho ladjo bene' guaten' cont soalencho Criston' con caten' ba bsi'e xnezenna'. Criston' gwžialagüe' bebane' ladjo bene' guat ca' na' cate' yide' da' yoble chio' chejnilaže'chone' lecze yebancho ladjo bene' guat še ba gotcho. ²⁴ Nach te che yežlio nga. Na' Criston' gwnitlagüe' yela' chnabia' che yogo' bene' chesegue'ede' Diosen' na' yeque'e yela' chnabia' che yogo' da' xigüe' ca'. Na' yeyožen' Criston' gone' lo na' Xe' Diosen' yogo' da' nłane' chnabi'e na' yogo' non' chnabi'e. ²⁵ Diosen' bžie' bia' zoa Criston' chnabia'che' ca yogo' bene' ca' na' bichle da' ca', na' Diosen' gone' cont žin ža cate' gwlej gwšošje' bene' ca' na' bichle da' ca' bi cheson txen len le'. ²⁶ Na' cate' yeyož gwlej gwšošje' yogo' bichle da' bi chon txen len le', nach gwcueze' yela' goten'. ²⁷ Diosen' ba nsi'e xnezen' cont yogo'lol' da' zjade zjanaquen lo na' Criston'. Perw bi nacho zejen Diosen' naque' lo na' Criston', san Diosen' nsi'e xnezen' cont yezica'chle bene' na' bica'chle da' zjade yesaquen lo na' Criston'. ²⁸ Nach cate' ba ben Diosen' cont yogo' da' zjade ba zjanaquen lo na' Criston', nach Criston' gwlo'e lecze le' naque' lo na' Xe' Diosen'. Can' gac cont yogo' benač na' yogo' angl yesacbe'ede' Diosen' naque' Xangaque', na' lecze yesacbe'e da' xigüe', beyixe' na' bichle da' zjade.

²⁹ Nita' bene' chesezoe' nis gualaz bene' ba gosat. Na' bibi zejen da' chesone' ca' šaca' bi žin ža yesyeban bene' guat ca'.

³⁰ Na' neto' yogo' ža nita' bene' chesaclaže' yesote' neto' da' choe'to' xtiža' Criston', na' bibi zejen zoa chbezto' ca' šaca' bi yesyeban bene' guat ca'. ³¹ Bene' migw, choa' diža' li chnia' chbechgüeda' ba chejnilaže'le Xancho Jesucriston', na' lecze ca' choa' diža' li chnia' yogo' ža chzanlaže' cuina' gac bi da' gac chia'. ³² Guac nacho bež znia ba gwdillena' Efeso nga ga ba gosedabaga'chgua bene' neda'. Na' bibi zejen ba bchejda' yogo' da' ba gosonde' neda' šaca' bi yesyeban bene' guat ca'. Na' šaca' bi yesyeban bene' guat ca', yejni'a goncho can' ža dižan' žan: "Ye'ej gagwtezcho, le gwxezen' gatcho."

³³ Bi güe'le latje yesonlede' le'e. Da' li can' ža to diža' da' de, žan: "Bene' chejlen bene' cheson da' mal lecze solao gone' can' chesone'na'." ³⁴ Le yeyon xbab šagüe' na' cuejyichjle xbab mal dan' chonlen', le balle bina' šejni'ile che Diosen'. Chnia' ca' da' chaclaža' gaquele zto' che da' malen' chonle.

Cuerp che bene' yesyeban ladjo bene' guat ca'

³⁵ Balle nabljale nac gac yesyeban bene' guat ca' o nac gac cuerp chegaquen' cate' yesyebane'.

³⁶ Nchol yichjlažda'olen' še chaquele bi gac yesyebane' ladjo bene' guat ca'. Nezecho to to xoa' dao' da' chazcho cheyala' yexinjen cont la' yel dao'.

³⁷ Na' caten' chazcho, bi chazcho yel daon', san chazcho xoa', nach chexinjen cont la' yel daon'. Na' can' chac len bi da' chazcho, con xsen' chazcho na' chla' yag dao' chen. ³⁸ Diosen' chone' cont

chla' yag dao' dan' chazchon', bi chla' yag yoble da' bi gozcho. ³⁹ Na' gague toze ca nac cuerp che chio' be_na_{ch} len cuerp che be žia tap n_i'a na'ba'. Nža' cuerp che be_na_{ch} na' nža' cuerp che be žia x_il, na' le_cze nža' cuerp che be chesaš lo' nis. ⁴⁰ Nža' cuerp che be_na_{ch}, nža' cuerp che beyi_xe', na' nža' da' ca' chle'echo le'e yaban', gwbiž, bio' na' beljw ca'. Na' nža' ye_la' xdan che gwbiž, bio' na' beljw ca', na' nža' ye_la' xdan che be_na_{ch} na' che beyi_xe' ca' chesaš lo' yežlion'. ⁴¹ Na' nža' ca chseni' gwbiž, nža' ca chseni' bio' na' le_cze nža' ca chseni' to to beljw ca'. ⁴² Nach cate' yesyeban be_ne' ca' ba gosat, cuerp chegaquen' bi gaquen ca cuerp da' gosape' cate' gosebane'. Cuerp chegaque' da' bosocuaše' lo' ban' ba beyožon', perw cuerp cobe chegaquen' gague da' te chen. ⁴³ Bibi zaca' cuerp che be_ne' guat ca', zjanaquen cuerp šen, na' cheyožon', da'nan' hcuaše'chon lo' ba. Perw be_ne' gosejnilaže' Criston', cate' yesyebane' ladjo be_ne' guat ca' yesyeyac cuerp chegaque' da' güen juisyw na' da' gual. ⁴⁴ Cuerp chegaquen' zjanaquen de bela' chen cate' chosocuašen' perw cate' yesyebane' ladjo be_ne' guat ca' nža' ba zjanac cuerp chegaquen', le yesyeyaquen cuerp cobe da' yeson con can' ža Spiritw che Diosen'. Nezecho cuerp chechon' da' de na'a naquen de bela' chen, na' le_cze cheyala' nezecho žin ža cate' yeyaquen da' cobe na' gonen con can' ža Spiritw che Diosen'.

⁴⁵ Xtiža' Diosen' nyojen žan Adán be_ne' goc be_ne' nechw gwzoe' gwbane' cani'. Na' na'a zoa Criston' zaca'lebde' ca Adánna', le Criston' chone' ye_la' mban to_li toca_ne. ⁴⁶ Na'a cuerp chechon' bi naquen

to da' chzenag che Spiritw che Diosen', perw žin ža yeyaquen da' cobe na' gwzenaguen che Spiriton'. ⁴⁷ Diosen' bene' be_{ne}' nechw len bište yo cont gwzoe' lo yežlio nga, perw Xancho Criston' ben' zaca'lebde' ca be_{ne}' nechon' ze'e yaba. ⁴⁸ Na' chio' be_nach, cuerp chechon' naquen ca cuerp che be_{ne}' nechon' da' ben Diosen' len bište yo, da'nan' naccho che yežlio nga. Na' chio' chejnilaže'cho Criston', žin ža cate' cuerp chechon' yayaquen da' cobe can' nac cuerp che Criston' be_{ne}' za' yaba. ⁴⁹ Na'a šlac zoacho yežlion' naccho ca be_{ne}' ben Diosen' len bište yo, perw cate' žin ža šjayzoacho yaban', gaccho ca Cristo ben' za' yaba.

⁵⁰ Be_{ne}' migw, chnia' le'e bi gac yežincho yaba gan' zoa Diosen' len cuerp chechon' de bela' chen. Da' te che cuerp checho quinga, da'nan' bi gac šjayzoalenchon len Diosen' toli toca_{ne}. ⁵¹ Chnia' le'e to da' nono gw_{ne}ze cani', gague yogo'chon' gatcho, perw yogo'chon' yeža' can' gaccho. ⁵² Bedao_{ne}z, ca bedaon' chžode' yejlaochon', yeža' can' gaccho cate' cuež trompeta che Diosen'. Cuež trompetan' na' yesyeban yogo' be_{ne}' ba gosat be_{ne}' gosejnilaže' Criston'. Na' cuerp chegaquen' yesyeyaquen da' cobe da' bi yesat na' lecze ca' chio' ne' mbancho yeža' cuerp chechon'. ⁵³ Le cuerp chechon' da' mbancho yežlio nga da' te chen. Naquen da' chat, na' cheyala' yayaquen da' cobe da' bi gat, da' bi gožo' na' da' bi te che. ⁵⁴ Cate' ba beyac cuerp chechon' da' cobe da' bi gat na' bi te chen, cana' ba goc can' nyoj Xtiža' Diosen' gan' žan: "Diosen' gwzoede' bcueze' yela' goten', na' chone' yela' mban toli toca_{ne}. ⁵⁵ Bich soe yela'

goten' chio' da' yoble. Gwbatech gatcho šo'cho lo' ba.” ⁵⁶ De yela' got checho na'a le chio' beñaçh choncho da' mal. Da' neze chio' beñaçh can' ža ley che Diosen' cheyala' goncho na' bi chzenagcho gonchon, da'nan' chnabia' da' malen' chio'. ⁵⁷ ChoçcLen Diosen' gwsele' Xancho Jesucriston' beque'e xtoła' chio' chejnilaže'chone'. Da'nan' bi soe yela' goten' chio', san de yela' mban toli tocañe checho.

⁵⁸ Da'nan' bene' migw chia', chacda' le'e na' chneyoeda' le'e le soaçaçh len toze xbab. Na' le gonçhgua xšin Xançon', le nezczecho cate' choncho xšinen' chejnilaže'chone', gague da' chondadzchon'.

16

Beñe' Corinto chosotobe' mechw cont yesaclene' bene' Jerusalénna'

¹ Nach nia' naquen' gonle cate' gwtoble mechw da' gaclenen bene' ca' chesejnilaže' Diosen' Jerusalénna'. Le gon can' bena' mandadw yeson bene' ca' chesedop chesežag chesonxene' Criston' to to yež da' zjachi' distritw Galacia. ² Yogo' ža dmiçw to tole cheyala' cuejle late' güeje mechw según gaca'te' benle gan lagüe' xman. Na' co'ošagüe'le mechon' cont den cate' yida' gan' zoale na' gague za' gwtoblen cate' yedena'a le'e. ³ Nach cate' la'a gan' zoalen', cana' gwzoja' cart da' yesoçe' bene' ca' chaclaže'le šjasesane' xmechwlen' Jerusalénna'. ⁴ Na' še chonen byen ša'a, cuina' çhi'a legaque' Jerusalénna'.

Pablon' chone' xbab šjañe'e bene' Corinto ca'

⁵ Na' yida' gan' zoale cate' yeyož yedia' Macedo-
nia, le cheyala' šjayna'a bene' lježcho ca' nita' na'.
⁶ Na' chacda' yega'anlena' le'e do tbio' do chop bio' o
še yega'ana' doxen tiemp zag, nach gaclenle neda'
cate' yeza' ša'a gate'teze ša'a. ⁷ Bi chaclaža' yedena'a
le'e na'a, le con teza' še ba za'a, na' chaclaža' soa'
šša len le'e cate' yida' še Xancho Diosen' gonšque'
latje. ⁸ Chaclaža' yega'ana' Efeso nga žinch ža gala'
lni dan' že' Pentecostés. ⁹ Le bene' zan že' nga bene'
chesaclaže' yosozenague' che Criston' na' lecze že'
bene' zan bene' bi chesaclaže' chixjue'eda' xtižen'.

¹⁰ Na' še la' Timoteon' gan' zoalen', le gwlebe'
na' le gwzenag che' cont bi žebe' gwsed gwlo'ede'
le'e, le can' chona' xšin Xancho Diosen', lecz can'
chonen'. ¹¹ Ne tole bi cheyala' gonle xbab bibi
zaca' da' chsed chlo'ede', san soale güen len le' na'
gaclenle' cate' yeze'e cont yeyede' gan' zoa' nga
to šagüe' to güen, le chbeza'ne' txen len yezica'chle
bene' lježcho ca'.

¹² Na' ca' nac Apolosen', gota'yoeda'ne' lecze
šejlene' Timoteon' gan' zoalen', txen len yezica'chle
bene' lježcho ca' yesaclene' le'. Perw bi chaclaže'
šeje' na'a, na' šeje' cate' soe' to latje.

*Yeto chope diža' da' choe'len Pablon' bene' Cor-
into ca'*

¹³ Le soa le na' can' chonlen', na' le soa len toze
xbab šejnilaže'le Criston'. Bi žeble, san le soachach
gonle can' chazlaže' Diosen'. ¹⁴ Na' le gaque lježle
bite'teze da' chonle.

¹⁵ Bene' migw chia', nezele bene' ca' že' liž
Estéfanos gosaque' bene' nechw gosejnilaže'
Criston' distritw Acayan' na' ba gosaclenchgüe'

yezica'chle bene' lježcho bene' chesejnilaže'ne'.
 16 Da'nan' chneyoeda' le gwzenag chegaque' na' gonle can' chesenen', na' le gwzenag che nochle bene' cheson xšin Diosen' na' chesaclene' bene' lježcho ca' can' chesone'na'. 17 Chebeda' ba besela' Estéfanos, Fortunato, na' Acaico gan' zoa' nga. Legaque' ba gosaclene' neda' cont bich chacyaše'da' dan' bi zoale nga len neda'. 18 Ba gosone' cont beyaclaža' can' ba gosoncze' len le'e cana', na' da'nan' cheyala' güe'cho yela' choxcen chegaque' che dan' ba gosonen'.

19 Bene' ca' chesedop chesežag chesonxene' Criston' doxen distritw Asian' chosoguape' le'e tiox. Na' Aquila na' Priscila na' bene' ca' chesežag ližgaque' chesonxene' Criston' lecze chosoguapchgüe' le'e tiox. 20 Nach yogo' bene' lježcho že' nga chosoguape' le'e tiox. Na' cate' chdop chžagle txen, le gwnopa' na' lježle cate' gwguap lježle tiox cont gacbia' chaque lježle.

21 Cuincza' neda' Pablo chzoja' late' dao' le'e cart nga chguapa' le'e tiox.

22 Na' še ne' nchixe balle bi chaquele Xancho Jesucriston', Diosen' gone' cont cuiaye'e toli tocanē. Xancho Jesucristo, yidšco' da' yoble.

23 Gaclenšca Xancho Jesucriston' le'e. 24 Chacda' yogo'le da' naccho txen chejnilaže'cho Cristo Jesúsēn'. Da' na'zen' žia' le'e.

**Diža' güen che ancho Jesucristo
New Testament in Zapotec, Zoogocho
(MX:zpq:Zapotec, Zoogocho)**

copyright © 1987 Wycliffe Bible Translators, Inc.

Language: Zapotec, Zoogocho

Translation by: Wycliffe Bible Translators, Inc.

Zapoteco, Zoogocho [zpq], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Zoogocho

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022
de7d40fb-3909-53d8-8bea-744cf1ce0e41